

辨

證

錄

辨證錄外科卷之十三

山陰陳士鐸敬之甫號遠公又號朱華子著述

會稽陶式玉尙書號存齋又號 泰訂

背癰門 七則

人有背心間先發紅瘰後漸漸紅腫此發背之兆也最爲可畏古人云外大如豆內大如拳外大如拳內大如盤言其外小而內實大也然而癰疽等毒必須辨其陰陽有先陰而變陽者有先陽而變陰者有前後俱陽者有前後俱陰者陽症雖重而實輕陰症雖輕而實重先陰

而變陽者生先陽而變陰者死病症既殊將何以辨之
陽症之形必高突而腫起陰症之形必低平而陷下陽
症之色純紅陰症之色帶黑陽症之初起必痛陰症之
初起必癢陽症之潰爛必多其膿陰症之潰爛必多其
血陽症之收口身必輕爽陰症之收口身必沉重至于
變陰變陽亦以此消息斷斷不差也倘見紅腫而高突
乃陽症之癰也乘其肉腫初發毒猶未化急以散毒之
藥治之可隨手愈也發背而至橫決者皆因循失治以
致破敗而不可救陽變陰者多矣救癰如救火宜一時

撲滅切勿見爲陽症無妨而輕緩治之也方用急消湯
忍冬藤二兩茜草三錢紫花地丁一兩甘菊花三錢貝
母二錢黃栢一錢天花粉三錢桔梗三錢生甘草三錢
水煎服一劑輕二劑又輕三劑全消不必四劑也此方
消陽毒之初起極神旣無迅烈之虞大有和解之妙世
人不知治法謂陽毒易於祛除孟浪用狼虎之藥雖毒
幸消散而真氣耗損於無形往往變成別病乃醫者成
之也

人有背心發癢甚已而背如山重悠悠發紅暈如盤之

大此陰癰初起之形象也最爲可畏尤非前症陽癰可比乃一生罪孽鬼祟纏身必然譫語胡言如見此等症候本不可救然而人心善惡成于一念之遷悔求生無術亦見醫道無奇蓋陽症有可救之術陰症豈無可生之理總在救之得法耳大約陰癰之症雖成于鬼祟之纏身然必正氣大虛邪得而入之也設正氣不虛邪將安入故救陰癰之症必須大用補氣補血之藥而佐之散鬱散毒之品則正旺而邪自散矣方用變陽湯人參二兩黃芪二兩金銀花半觔煎湯代水附子一錢荊芥

炒黑三錢柴胡二錢白芍一兩天花粉五錢生甘草五錢井花水煎汁二碗服渣再煎服後陰必變陽而作痛再一劑而痛亦消再服一劑而全愈竟消滅無形也然人不致皮破血出斷不肯信雖然先用此等之藥以治發背毋論病人不肯服卽醫生亦不肯用或醫生知用此治療而病人之家亦不肯信往往決裂潰爛瘡口至如碗大而不可收始悔參芪之遲用矣予旣論此症又多戒辭勸人早服此方萬不可觀望狐疑喪人性命蓋陽毒可用攻毒之劑而陰毒須用補正之味用人參黃

芪以補氣氣旺則幽陰之毒不敢入心肺之間而金銀
花性補善解陰毒得參芪而其功益大然非得附子則
不能直入陰毒之中而又出于陰毒之外毒深者害深
又益之生甘草以解其餘毒然毒結于背者氣血之壅
也壅極者鬱之極也故加柴胡荆芥白芍天花粉之類
消痰通滯開鬱引經自然氣宣而血活痰散而毒消矣
人有背癰潰爛洞見肺腑瘡口黑陷身不能臥口渴思飲
人以爲陽症之敗壞也誰知是陰虛而不能變陽乎夫
背癰雖有陰陽之分及至潰濃之後宜補內不宜消外

則陰陽之症一也潰爛而至肺腑皆見此乃失補之故使毒過于沿燒將好肉盡化爲瘀肉耳肉瘀自必成腐肉而腐自必洞見底裏見此等症候亦九死一生之兆也倘胃氣健而能食者猶可救倘見食則惡者斷無生意雖然能用參芪歸熟亦有可生不可棄之竟不救也方用轉敗湯救之人參二兩生黃芪一兩熟地二兩肉桂二錢白朮四兩當歸一兩金銀花四兩麥冬二兩山茱萸一兩遠志三錢北五味子一錢茯苓三錢水煎服一劑而胃氣大開者卽可以轉敗爲功也倘飲之而稍

能健飯亦在可救惟恐飲之杳無應驗者是胃氣已絕
也不必再治之矣或飲之而飽悶少頃而少安者亦有
生機此方補其氣血而更補其肺腎之陰蓋陰生則陽
長陰陽生長則有根易于接續而後以金銀花解其餘
毒則毒散而血生血生而肉長肉長而皮合必至之勢
也倘日以解毒爲事絕不去補氣血之陰陽則陰毒不
能變陽有死而已可勝悲悼哉

人有背癰將愈而瘡口不收百藥敷之絕無一驗人以爲
餘毒之未盡也孰知是陰虛而不能濟陽夫癰疽初起

則毒盛變膿則毒衰濃盡則毒化矣瘡口不收乃陰氣之虛而非毒氣之旺世人不知治法尙以敗毒之藥攻之是已虛而益虛也欲其肌肉之長何可得乎然亦有用補法而仍未效者但用陽分之品以補其陽而不用陰分之藥以補其陰也獨陰不長而獨陽亦不生癰疽至膿血已盡則陰必大虛止補其陽則陽旺陰虛陰不能交於陽矣陽有濟陰之心陰無濟陽之力所以愈補陽而陰愈虛而瘡口愈難合也治法必須大補其陰使陰精盛滿自能灌注于瘡口之中不用生肌外敷之藥

而瘡口之內生矣方用生膚散麥冬一兩熟地二兩
山茱萸一兩人參五錢肉桂一錢當歸一兩忍冬藤一
兩白朮五分水煎服二劑而肉自長又二劑外口自平
又二劑全愈此方補陰之藥多於補陽使陰勝陽也然
補陽仍是補陰之助以其能入陰之中交於陽之內也
忍冬藤非特解餘刺之毒取其能領諸藥至于瘡口之
間也

人有背瘡長肉瘡口已平忽然開裂流血人以爲瘡口之
肉未堅也誰知是色慾惱怒之不謹耳大凡瘡癰之症

最忌色慾次忌惱怒犯惱怒新肉有開裂之虞色慾新肉有流血之害犯惱怒者不過疾病犯色慾者多致死亡其瘡口開裂之處必然色變紫黑而流水之處必然肉變敗壞矣此時必須急補氣血萬不可仍治其毒蓋前毒未盡斷難收口復至腐爛新肉不堅而自湧決裂也況發背新愈之後其精神氣血盡爲空虛若交合泄精遂至變害非常舍補氣血又安求再活乎卽補氣血以些小之濟欲收危亂之功大廈傾頽豈一木能支哉故又須大劑救之而後可方用寒變回生湯人參四兩

黃芪三兩當歸二兩北五味子二錢麥冬二兩肉桂三錢白朮二兩山茱萸五錢忍冬藤二兩茯苓一兩水煎服一劑而肉不腐二劑而肉自生三劑而皮仍合四劑瘡口平復切戒再犯再犯無不死者卽再服此方無益也可不慎乎此救瘡瘍壞症仙丹不止療發背愈後犯色之敗腐也人疑泄精以致決裂宜用熟地以大補之何故反置而不用以熟地補陰最緩而症犯甚急所以舍熟地之不可用此方服數劑之後各宜減半惟多加熟地留爲善後之計耳

人有夏月生背癰瘡口不起脉大而無力發熱作渴自汗盜汗用參芪大補之劑益加手足逆冷大便秘喘促嘔吐人以爲火毒太盛也誰知是元氣大虛補不足以濟之夫癰分陰陽瘡口不起乃陰症而非陽症也脉大似乎陽症大而無力非陰而何發熱作渴此水不足以濟火故陡渴陡汗也旣陰症似陽用參芪陽藥以助陽正氣足以祛陰而返陽矣何以愈補而反逆冷嘔吐此陰寒之氣正甚而微陽之品力不能勝耳非加附子辛熱之品又何能斬關入陣以祛蕩其陰邪哉方用助陽

消毒湯人參半觔黃芪一兩當歸四兩白朮四兩陳皮
一兩附子五錢水煎膏作二次服諸症退連服數劑瘡
起而潰乃減半又用數劑而愈此非治癰之法也然治
癰之法而輕治此等之症鮮不立亡可見治癰不可執
也大約陽癰可以消毒化痰之藥治之陰癰之病萬不
可用消毒化痰之味此實治癰之變法醫者不可不知
人有背生癰疽潰膿之後或發熱或惡寒或作痛或膿多
或流清水自汗盜汗膿成而不潰口爛而不收人以爲
毒氣之未盡也誰知五臟虧損血氣大虛之故凡人氣

血壯盛陰陽和平何能生毒惟其臟腑內損而後毒氣得以內藏久之外泄及至癰疽發出其毒自不留內然臟腑原虛又加流膿流血則已虛益虛觀其外瘡口未斂似乎有餘審其內氣血未生實爲不足法當全補不宜偏補夫一臟致有偏勝之虞也方用十全大補湯最妙以其合氣血而兩補之耳然而用之往往不效者非方之不佳乃用方之不得其法耳夫背癰何等之症豈用尋常細小之劑所能補之必須多加分兩大劑煎飲庶幾有濟予因酌定一方以請正于同人也用人參一

兩黃芪二兩白芍五錢肉桂二錢川芎三錢熟地二兩
當歸一兩白朮五錢茯苓五錢生甘草三錢水煎服
一劑有一劑之效世疑此方絕不敗毒如何化毒而生
肉不知癰疽未潰之前以化毒爲先已潰之後補正爲
急縱有餘毒未盡不必敗毒蓋敗毒之藥非寒涼之品
卽消耗之味也消耗則損人真氣寒涼則傷人胃氣真
氣損則邪氣反盛胃氣傷則穀氣全無又何能生長肌
肉哉惟十全大補湯專助真氣以益胃氣故能全效耳
且此方不特治背癰之已潰卽瘡瘍已潰者皆宜用之

肺癰門 四則

人有胃膈間作痛咳嗽時更加痛極手按痛處尤增氣急
人以爲肺經生癰也誰知是肺熱生癰耳夫肺爲嬌臟
藥食之所不到者也故治肺甚難肺熱害肺既可成癰
將何法療之療之法似宜救火以瀉肺肺藥不可入而
肺爲脾之子脾經未嘗不受藥也補其脾經之土則土
能生金也平其肝經之木則金不能尅木矣清其心經
之火則火不能刑金也三經皆有益于肺無損于金則
肺氣得養而後以消毒之品直解其肝中之邪何難于

不收乎方用全肺湯元參三兩生甘草五錢金銀花五兩天花粉三錢茯苓三錢白芍三錢麥冬二兩水煎服一劑而痛減二劑而內消矣大凡癰疽之症必須內消不可令其出毒內消之法總不外脾肝心三經治之而無別消之道或曰肺之子腎也獨不可治腎以消乎然肺癰之成雖成于火燥肺金之液實因肝氣之自虛也補腎雖使肺氣不來生腎惟是肺氣相通補腎之水恐肺氣下降而火毒反不肯遽散不若止治三經使肝氣得養自化其毒不遺于腎之爲妙也

人有胸膈作痛咳嗽不止吐痰更覺疼甚手按痛處不可忍咽喉之間先聞腥臭之氣隨吐膿血此肺癰不獨已成而且已破矣夫肺癰未破者易于消已破者難于治爲膿血未能遽淨耳然得法亦不難也蓋肺之所以生癰者因肺火不散也然肺火來因肺氣虛也肺虛而火留於肺火盛而後結爲癰不補虛而散火而未成形者何以消已成形者何以散旣潰爛者又何以愈哉是虛不可不補而補虛者補何臟乎必須補肝氣之虛而肺不能直補其氣補胃氣之虛則肺氣自旺也今癰已破

矣多吐膿血則肺氣尤虛雖毒尙存不可純瀉其毒于
補氣之中而行其攻散之方而行其攻散之法則毒易
化而正氣無傷方用完肺飲人參一兩元參二兩蒲公
英五錢金銀花二兩天花粉三錢生甘草三錢桔梗三
錢黃芩一錢水煎服一劑膿必多二劑膿漸少三劑疼
輕四劑而又輕五劑痛止膿血亦止六劑竟奏全功此
方補胃中之氣卽瀉胃中之火胃氣旺肺氣不能衰胃
火衰肺火不能旺所以能敗毒而又能生肉耳其諸藥
亦能入肺不單走於胃然而入胃者十之八入肺者十

之二仍是治胃益肺之藥也或問肺癰已破病已入裏似不宜升提肺氣南昌喻嘉言謂宜引之入腸而先生仍用桔梗以開提肺氣恐不可爲訓嗟乎予所用之藥無非治胃之藥藥入于胃有不引入腸者乎然肺氣困頓清肅之令不行用桔梗以清肺上氣通而下氣更速然則上之開提正下之迅遂也

人有久嗽之後肺受損傷皮膚黃瘦咽嗑雌啞自汗盜汗臥眠不得口吐稠痰腥臭難聞而毛悴色憔悴之時必忍氣須臾輕輕吐痰始覺膈上不痛否則必大痛不已

氣息奄奄全無振興之狀人以爲肺中生癰也誰知是肺痿而生瘡耳此症本係不救之病然治之得法調理又善亦有生機者夫肺癰與肺痿不同肺癰生于火毒治之宜速肺痿成于勞傷治之宜緩火毒宜補中用瀉勞傷宜補中帶清瀉與清不同而補則同也惟是瀉中用補可用大劑清中用補可用小劑忽忘勿助若有若無庶能奏功也方用養肺去痰湯金銀花三錢生甘草五錢生地二錢麥冬三錢紫苑五錢百部五分百合二錢款冬花三分天門冬一錢貝母三分白微三分水煎

服服十劑膈上痛少輕者便有生機再服十劑更輕再服十劑而漸愈前後共服六十劑而始全愈也是方不寒不熱養肺氣于垂絕之時保肺葉于將痿之頃實有奇功倘捷效於一旦必至輕喪于須臾寧忍耐以全生切勿欲速而送死

世有膏粱子弟多食厚味燔熬烹炙煎炒之物時時吞嚼或美醞香醪乘興酣飲遂至咽乾舌燥吐痰唾血喘急膈痛不得安臥人以爲肺經火熾也誰知是肺癰已成耳夫肺爲五臟之蓋喜清氣之薰蒸最惡燥氣之炎逼

今所飲所食無非辛熱之物則五臟之中全是一團火
氣火性炎上而肺金在上安得不受害乎肺既受害不
能下生腎水腎水無源則腎益加燥勢必取資于肺金
而肺金又病能不已虛而益虛已燥而更燥也况各經
紛然來逼火烈金刑肺間生癰必然之勢也治之法化
毒之中益之養肺之法降火之內濟之補腎之方庶幾
已成者可痊未成者可散也方用枝桑清肺丹桑葉五
錢紫苑二錢犀角屑五分生甘草二錢款冬花一錢百
合三錢杏仁七粒阿膠三錢貝母三錢金銀花一兩熟

地一兩人參三錢水煎將犀角磨末冲服數劑可奏功也此方肺腎同治全不降火蓋五臟之火因飲食而旺乃虛火而非實火也故補其水而金氣堅補其水而虛火息况補中帶散則補非呆補而火毒又容易辭也

肝癰門 二則

人有素多惱怒容易動氣一旦兩脇脹滿發寒發熱旣而脇痛之極手按痛處不可忍人以爲肝火之盛也誰知是肝葉生瘡耳世人但知五臟中惟肺生癰不知肝亦能生癰也且靈素諸書亦未有及得毋創論以驚世乎

余實聞異人有謂脇痛手不可按者肝葉生癰也靈素
二經不談者肝經生癰世不常有古人未有此症所以
畧而不言蓋古今之氣運不同而癰毒之生長不一肝
一惱怒則肝葉張開肝氣卽逆大怒之後肝葉空脹未
易平復且怒必動火怒愈多而火愈盛火盛必燥乾肝
血燥乾則肝氣大燥無血養肝更易發怒怒氣頻傷欲
不鬱結而成癰烏可得乎然癰生於內何從而見然內
不可見而外卽可辯也凡生癰者脇在左而不在右左
脇之皮必現紅紫色而舌必現青色以此辯症斷斷無

差治之法必平肝爲主而佐之瀉火去毒之葯萬不可因循時日令其潰爛而不可救也方用化肝消毒湯白芍三兩當歸三兩炒梔子五錢生甘草三錢金銀花五兩水煎汁一碗飲之一劑而痛輕二劑而痛又輕三劑而痛如失減半再服數劑而全愈此方用當歸白芍直入肝中以滋肝血則肝血驟生易解肝血之燥又得甘草以緩其急梔子清火金銀花解毒安得不取效之捷哉蓋是火毒旣盛肝血大虧用此方而不如此大劑煎飲亦自徒然倘執以肝火之旺而非是肝癰之成單用

歸芍以治脇痛斷不能取效也

人有左脇間疼痛非常手按之更甚人以爲脇痛而不知非脇痛也此乃肝經之癰耳夫肝經生癰多得之惱怒予前條已暢論之矣然而肝癰不止惱怒能生而憂鬱亦未嘗不生癰也惟因惱怒而得之者其痛驟因憂鬱而得之者其痛緩當初痛之時用逍遙散大劑煎飲痛立止又何至成癰也因失于速治而肝中鬱氣苦不能宣而血因之結矣血結不通遂化膿而成癰其勢似乎稍緩然肝性最急癰成而毒發其驟也世有脇痛數日

而死者正因生癰毒敗而死非脇痛而卽能死人可不
急救治之乎方用宣鬱化毒湯柴胡二錢白芍一兩香
附二錢薄荷二錢當歸一兩陳皮一錢枳殼一錢天花
粉三錢生甘草三錢金銀花一兩水煎服一劑而痛輕
二劑而痛減三劑而痛又減四劑全愈重則不出六劑
愈後用四物湯大劑調治不再發也夫肝癰世不常見
既有前條不必又論及此然肝癰不可見而脇痛世人
之所常病吾特發明憂鬱之能成又若此則人知急治
何至成癰哉

大腸癰門 三則

人有腹中痛甚手不可按而右足屈而不伸人以爲腹中
火盛而存食也誰知是大腸生癰耳大凡腹痛而足不
能伸者俱是腸內生癰耳惟大腸生癰亦實有其故無
不成于火火盛而不散則鬱結而成癰矣然而火之有
餘實本于水之不足水衰則火旺火旺而無制乃養成
其毒而不可解然則治之法又何必治火哉壯水以治
火則毒氣自消方用清腸飲金銀花三兩當歸二兩地
榆一兩麥冬一兩元參一兩生甘草三錢薏仁五錢黃

芩二錢水煎服一劑而痛少止二劑而足可伸再二劑而毒盡消矣此方純陰之物而又是活血解毒之品雖瀉火實滋陰也所以相濟而相成取效故神耳倘不益陰以潤腸而惟攻毒以降火則大腸先損又何勝火毒之凌爍哉毋怪愈治而愈不能效也

人有大腸生癰右足不能伸腹中痛甚便出膿血肛門如刀割此腸癰已經潰爛也能食者生不能食者死雖然不能食之中亦有非因火毒之熾而然者又不可因其不能食而棄之也大凡生此各種癰瘡俱以有胃氣爲

佳無胃氣母論陰毒陽毒多不可救故治陰疽之病斷以扶胃氣爲第一法而少加之敗膿祛毒之藥則正氣無傷而火毒又散今大腸癰破而致飲食不思則胃氣已盡絕大危之症也不急補胃惟治癰必死之道也方用開胃救亡湯人參一兩金銀花二兩山藥一兩生甘草三錢薏仁一兩元參一兩白朮一兩山羊血研末一錢水煎調服一劑胃開二劑膿少三劑痛止四劑全愈此方全去救胃而敗膿祛毒已在其中妙在金銀花雖治毒而仍滋陰之藥爲瘡家奪命之物軍乃至仁至勇

之師又得參朮以補助其力卽散毒尤神山羊血止血
消渴且善通氣引諸藥入癰中解散之乃鄉導之智者
也合而治之則調合有人撫綏有人攻剿有人安得不
奏功如神乎自然胃氣大開化精微而輔輸于大腸也
倘胃氣未傷服之尤奏功如嚮萬勿疑畏不用此方枉
人性命耳

人有大腸生癰小腹痛甚淋漓不已精神衰少飲食無味
面色痿黃四肢無力自汗盜汗夜不能臥人以爲火盛
生癰也誰知水衰不能潤腸耳夫大腸之不能傳導者

全藉腎水之灌注今因醉飽房勞過傷精力大泄其精
遂至火動而水涸又加生冷並進以致氣血乖違濕動
痰生腸胃病塞運化不通氣血凝滯而成癰也然則生
癰之先本是腎水不足癰潰之後又復流其水是因虛
而益虛矣若作久毒治之鮮不變爲死症必須大補其
腎水而並補其脾胃之氣則脾胃化精生水更易枯涸
之腸一旦得滂沱之潤自然淹足不必治癰而癰已化
氣血足而肌肉生也方用六味地黃湯加味治之熟地
二兩山藥八錢牡丹皮六錢山茱萸八錢茯苓三錢澤

瀉一錢人參一兩黃芪五錢麥冬一兩水煎連服數劑
腹痛止而精神健前症頓愈此方六味以補腎水加人
參麥冬黃芪以補脾胃之土土旺而肺氣自旺肺與大
腸爲表裏且又爲腎之母自然子母相需表裏相顧故
奏功如神也

小腸癰門 三則

人有腹痛口渴左足屈而不伸伸則痛甚手按其痛處更
不可忍人以爲腸中生癰也然而腸中生癰不同有大
小腸之分屈右足者大腸生癰屈左足者小腸生癰也

今屈而不伸者卽在左足是癰生于小腸而非生于大腸矣惟是大腸之癰易治小腸之癰難醫以大腸可瀉而小腸難瀉也雖然得其法又何不可瀉哉蓋大腸可瀉其火從糟粕而出小腸可瀉其火從溲溺而泄也方用泄毒至神湯金銀花三兩茯苓一兩薏仁一兩生甘草三錢車前子三錢劉寄奴三錢澤瀉三錢肉桂一分水煎服一劑而水如注二劑而痛頓減三劑而症如失不必四劑也此方俱利水之藥止一味金銀花消毒之味何以建功之神如此蓋小腸之毒必須內消而內消

之藥舍金銀花實無他藥可代以他藥消毒皆能損傷正氣而小腸斷不可損傷故必須以金銀花爲君但金銀花不能入小腸之中今同茯苓薏仁澤瀉車前子之類引入小腸又加肉桂一分得其氣味引入膀胱從溲溺而化又恐火毒太盛諸葯不能迅逐更加劉寄奴之速祛甘草之緩調剛柔遲速並行旣無留滯之虞而復無峻烈之害自然火毒殆盡膀胱小腸而出也

人有腹痛呼號不已其痛却在左腹按之痛不可忍不許人按醫以爲食積在大腸也誰知是小腸之生癰耳凡

脇癰必屈其足而今不屈足似非腸癰之病然腸癰生於腸內者必屈其足在大脇者屈右足而不伸在小脇屈左足而不伸也若癰生于腸外者皆不屈足痛在左則小腸生癰痛在右則大腸生癰也至食積燥屎之痛時而痛時而不痛故痛在左明是小腸之外生癰也大腸生癰于腸內尚可破潰而大小腸生癰于腸外斷不可使之破潰者以腸外無可出之路皆必死之症也而小腸更甚必須急早治之方用內化丹金銀花四兩當歸二兩車前子五錢生甘草三錢茯苓一兩薏仁一

兩水煎服一劑而痛大減二劑而痛又減三劑而痛全
止四劑全愈此方卽前方之變方也但前方以利水之
中而行其敗毒之法此方于利水之中補血以敗毒之
法也蓋癰破利水則毒隨水出易于祛除癰未破不補
血以利水則水泄而血虛難于消化同中之異不可不
知也然此方亦須急早治之則有益否則癰雖愈而瘀
血流于腸外必有終身腹痛之病也

人有腹痛驟甚小便流血左足不能伸人以爲小腸生癰
也誰知是小腸之火太盛耳夫小腸生癰必屈左足今

左足不伸明是生癰之證而予獨謂是火盛者何故不
知生癰必有其徵未有一旦驟生而卽流血者也癰曰
久而膿生膿欲盡而血出豈有不潰不爛而先出血者
然左足之屈則又何也蓋小腸與大腸不同小腸細而
大腸寬寬者可以容邪而細者難以容邪此必然之理
小腸受火煎熬則腸中逼迫腸不能舒而左足應之故
暫屈而不伸耳但不可因足之不伸卽信是癰而妄用
解毒之藥然從何處辨之因其初病之時辨其小便之
有血無血耳初起痛而足屈若小便無血乃是生癰初

起痛而足屈小便有血乃是火痛斷不可差也治之法
瀉其火邪不必化毒而痛止足伸矣方用小柴胡湯加
味治之柴胡一錢黃芩三錢甘草一錢茯苓五錢人參
二錢半夏一錢水煎服一劑而足伸二劑而血止腸亦
不痛矣小柴胡湯非治小腸之藥也何以用之而效驗
之捷如此因小腸之火盛者起于肝膽之鬱也木鬱則
火生不敢犯心而犯小腸耳夫火性炎上今不上炎反
致下熾拂其火性矣此小腸所以受之而作疼痛也至
于流血于小便中者又是何故蓋是小腸之血爲火所

逼惟恐爲火之燦乾故越出于小腸之外直走膀胱反使火道不行而流血也小柴胡湯既舒其肝膽之氣則火氣上炎其生旣順而不逆又得茯苓以清消其水氣水流而血自歸經此方之所以奇耳

無名腫毒門 二則

人有頭面無端忽生小瘡癢甚第二日卽頭重如山第三日面目青紫世人多不識此症此乃至危至急之病苟不速救數日之內必一身發青黑而死若青不至心胸者尙可救療因其人素服房中熱藥熱極便爲毒也凡

人入房而久戰不泄者雖氣主之而實火主之也氣旺而非火濟之則不足以鼓動其興趣而博人戰之歡補氣之藥斷不能舍參芪而求異味世人貪歡者多吝惜者亦復不少用熱藥以助火非多加人參不足以駕馭其猛烈之威無如人參價高力難多備方士不得已遷就世人乃少減人參則功力自薄及多加熱藥以壯其火於是金石火煨之藥紛然雜用謂不如此不足以助其命門之火也夫命門之火腎火也非真陰之水不養不同于脾胃之火可以外水解之也且腎火既旺則外

勢剛強必多御女一取快樂偶爾縱慾亦復何傷無奈
淫心無盡愈戰愈酣火熾則水乾火沸則水涸卽不頻
泄其精水亦不足以制火而熱毒有結于腸胃者矣况
戰久則興必深未有不盡興而大泄者精泄過多則火
更旺未免陽易舉而再戰或歸于前藥之太少更多服
以助其勢熟知藥益多而火益烈戰益頻而水益竭乎
久之水涸火炎陽雖易舉而不能久戰未免有忍精繼
絀之時勉強而鬪精不化而變爲毒結于陰之部位而
成癰結于陽之部位而成毒頭上者正陽之部位也較

生于陰之部位者更爲可畏非多用化毒之藥又安能
起死爲生哉方用回生至聖丹生甘草五錢金銀花半
觔玄參三兩蒲公英三兩天花粉三錢川芎一兩水煎
服一劑而頭輕青紫之色淡矣再服二劑青紫之色盡
消而瘡亦盡愈不必三劑也此方化毒而不耗其氣敗
毒而不損其精所以建功甚奇也此毒原係水虧之極
而瀉毒諸藥無不有損于陰陽惟金銀花攻補兼妙故
必須此品爲君但少用則味單而力薄多用則味重而
力厚又加玄參以去火甘草以瀉毒蒲公英之清熱天

花粉之消毒川芎之散結自然相助而奏效也

一無名腫毒生于思慮不到之處而其勢凶惡有生死之關皆可以無名腫毒名之不必分上中下也前條止言頭上而在身之左右前後與手足四肢尙未言也不知得其治法無不可以通治失其治法則在上者不可以治中在中者不可治下在下者不可以治上中也得其治法者若何大約上中下之生無名腫毒者多起于淫慾無度之人又加之氣惱憂鬱火乘其有隙之處蘊藏結毒故一發而不可救所以無名腫毒盡是陰症而絕

無陽症也然則治之法宜用解陰毒之藥矣惟是解陰毒之藥多半消鑠真陰因虛而結毒復解毒而虧陰安有濟乎故無名腫毒往往不救乃是故也余得異人之傳仍于補陰之中以行其散鬱之法可佐之解毒之品微助行經之味是以多收其效余不敢湮秘傳之書而負萬世之人也方用立參一觔柴胡三錢生甘草二兩三味煎湯十碗爲主倘生於頭面加川芎二兩附子二錢再煎汁取三碗分作二日服完未破者卽消已破者卽生肌而自愈不必二劑也倘生于身中前後左右加

當歸二兩甘菊花一兩附子三分亦如前煎服倘生子
手足四肢加白朮二兩附子五分茯苓一兩亦如前煎
服無不收功此方名收黑虎湯言卽至惡之人見黑虎
亦未有不寒心者是惡毒得之盡散也玄參最善退浮
游之火得甘草之助能解其迅速之威得柴胡之輔能
舒其抑鬱之氣且又有各引經之味引至結毒之處大
爲祛除妙在用至一觔則力量更大又妙是補中去散
則解陰毒而不傷陰氣所以奏功更神人勿驚其藥料
之重而不敢輕試深負鐸一片慇懃救世之懷也若些

小輕症與非陰症瘡毒俱不必用此重劑又不可不知耳

對口癰門一則

人有對口之後忽生小瘡先癢後痛隨至潰爛人以爲至凶之癰也然而癰生于對口者猶輕而生于偏旁不勝對口者尤重蓋頸項之上乃腎督之部位也其地屬陰所生癰疽多是陰疽而非陽癰也陽疽必高突數寸其色紅腫發光疼痛呼號若陰癰則不然色必黑黯痛亦不甚身體沉重困倦欲臥呻吟無力其瘡口必不突起

或現無數小瘡口以眩世人不知從何處覓頭然而陰陽二毒皆可內消何可令其皮破腫潰而後治之乎至於內消之法正不須分辨陰陽惟既破潰膿陰陽不審而漫投藥餌則禍生頃刻而內消之法大約止消三味名爲三星湯金銀花二兩蒲公英一兩生甘草三錢水煎服二劑即便全消陽症已破者仍以此方治之不三服必膿盡肉生若陰症大潰者此方不可復投改用七聖湯人參一兩生黃芪一兩當歸一兩金銀花二兩白朮一兩生甘草三錢肉桂一錢水煎服一劑而血止二

劑而肉生三劑而口小四劑而皮合再服二劑全愈此
方治各處癰毒凡低陷而不能收口者無不神效不止
治對口之陰毒善收功也誠以陽症可以涼瀉而陰症
必須溫補故耳

腦疽門 一則

世有生癰疽於頭頂者始名腦疽若對口偏口俱非真正
腦疽也此疽九死一生然治之得法俱可救也大約生
此疽者皆腎火之沸騰也蓋腦爲髓海原通于腎腎無
火則髓不能化精腎多火則髓亦不能化精豈特不能

化精隨火之升降且化爲毒以生癰疽矣蓋腎之化精
必得腦中之氣以相化若腦中無非腎火勢必氣化爲
火火性炎上不及下降卽于腦中髓海自發其毒較之
腦氣下流爲毒者其毒更甚故往往有更變形容改換
聲音瘡形紫黑煩燥口乾隨飲隨渴甚至腦骨俱腐片
片脫下其狼狽之狀有不可以言語形容者又將何以
救之耶此症須問其飲食如何倘飲食知味卽可用藥
方用五聖湯治之金銀花半觔玄參三兩黃芪四兩麥
冬三兩人參二兩水煎服連服四劑其癰疽漸愈改用

十全大補湯重四兩與之服四劑又改爲八味地黃湯
恣其酣飲可獲全愈矣是此等治療亦九死一生之法
然舍吾法實無有第二法矣人生此疽得于房術者俱
多興陽澁精都是丹石燥烈之品或洗或嚼或嚥于口
或藏于臍霸阻精道久戰不已日積月累真陰枯爍髓
竭火發遂潰頂門多致不救人何苦博嬾女之歡喪千
金之命長號於夜臺也

囊癰門 二則

人有陰囊左右而生癰毒者名曰便毒生于囊之下糞門

穀道之前名曰囊癰三處相較便毒易治而囊癰最難療也以囊之下爲懸癰其皮肉與他處不同蓋他處皮肉或橫生或直生俱易合口而懸癰之處橫中有直直中有橫一有損傷不易收功然治之有法未嘗難也此等之癰皆少年貪于酒色或遊花街而浪戰或入柳巷而角歡忍精而闕耐飢而交或已泄而重提其氣或將敗而再鼓其陽或有毒之婦而輕于苟合或生瘡之妓而甘爲精闕往往多生此癰所謂欲洩不洩化爲膿血是也治之法必須大補其虛而佐之化毒之味以毒因

虛而成不治虛可得乎方用逐邪至神丹金銀花四兩
蒲公英二兩人參一兩當歸二兩生甘草一兩大黃五
錢天花粉二錢水煎服一劑而毒消二劑而全愈潰者
三劑可以收功矣此方用金銀花四兩用蒲公英二兩
佐之參歸大黃之大料未免過于霸氣然大虛之病又
用大黃祛逐似乎非宜誰知毒正盛乘其初起之時正
未甚衰大補瀉火之爲得乎倘因循失治或畏縮而不
敢治及至流膿出血正氣蕭索始用參芪補氣往往有
用至數斤而尙未能復元何不早用于化毒之中正又

無傷而毒又易散哉此因勢利道之法又不可不知也
人有飲燒酒入房精不得泄至夜半寒熱煩渴小便淋赤
痰涎湧盛明日囊腫腹焮痛又明日囊處悉腐玉莖下
面貼囊者亦腐人以爲酒毒也誰知是肝火得酒毒濕
而肆虐乎夫酒何至作腐蓋火酒大熱之物也人過飲
火酒多致醉死死後往往身體腐爛以火酒乃氣酒遇
熱自焚人身臟腑原自有火以火引火安得不炎燒耶
飲火酒而入房以鼓動精房之火宜是命門之火而非
肝火也然而木能生火肝屬木肝木生于相火實理之

常也入房而借火酒之力則火勢必猛火動無根何能
久乎勢必精欲外泄而火可解也無奈精欲泄而阻抑
之火無可泄之路火無可依而火酒又無可解于是火
入于肝將依母而自歸也惟相火內火也可附肝以爲
家而酒火外火也反得木而焚體囊與玉莖乃筋之會
也筋屬肝因入房而火聚于陰器之際故火發而囊腫
囊腫極而莖亦腐治法解酒毒而益補氣補血之品則
濕熱解而腐肉可長矣方用救腐湯人參一兩當歸一
兩黃芪二兩白朮一兩茯苓五錢黃柏三錢薏仁五錢

澤瀉三錢白芍一兩葛根三錢炒黑梔子三錢水煎服
四劑腐肉脫而新肉生再服四劑囊莖悉平復矣酒毒
成于拂抑平肝泄火利濕解毒宜也何以又用參芪歸
朮以大補其氣血耶大凡氣血盛者力能勝酒縱酣飲
而無礙服火酒而腐必成于火酒之毒亦其氣血之衰
力不能勝酒所以兩火相合遂至焚身外腐苟不急補
其氣血則酒毒難消而腐肉又何以速長哉

臂癰門 一則

人有兩臂之間忽然生瘡而變成癰疽者亦陰癰也雖較

頭面對口肩背上少輕然治不得法亦能殺人故須辯陰陽之治大約痛者陽症癢者陰症不難于治也如陽症用三星湯一二劑便可立消若陰症三星湯又不可用必須大補氣血而佐之消痰化毒之劑始能奏功不可謂手足非心腹之疾不須補虛也夫陰主靜而兩手則至動者也至動而生陰癰則動變爲靜矣反常之道也可不畏乎况動變爲靜又趨陰之道也陽趨于陰非生近于死乎欲陽返于陰則易欲陰返于陽則難誰謂兩手之癰而可小視之哉治法仍宜慎重方用消癰還

陽丹人參三錢白朮一兩生甘草三錢天花粉三錢生黃芪一兩金銀花二兩肉桂一錢當歸五錢乳香末一錢水煎服一劑而癢變爲痛矣二劑而痛如失三劑而全消不必四劑也此方與七聖湯相同而意氣各異七聖治已潰者也此方治未潰者也已潰者以生肉爲先未潰者以護肌爲主所以七聖湯內無乳香天花粉者正以二味之中有擁衛之功耳

乳癰門

四則

人有乳上生癰先痛後腫尋常發熱變成瘍癰此症男婦

皆有而嬾人居多蓋婦人生子兒食乳時後偶爾貪睡
兒以口氣吹之使乳內之氣閉塞不通遂至生痛此時
卽以解散之藥治之隨手而愈倘因循失治而乳癰之
症成矣若男子則不然乃陽明胃火熾盛不上騰于口
舌而中擁于乳房乃生此病故乳癰之症陽病也不比
他癰有陰有陽所以無容分陰陽爲治法但當別先後
爲虛實耳蓋乳癰初起多實邪久經潰爛爲正虛也雖
然邪之有餘仍是正之不足于補中散邪亦萬全之道
正不必分先宜攻而後宜補也方用和乳湯貝母三錢

天花粉三錢當歸一兩蒲公英一兩生甘草二錢穿山
甲土炒一片爲末水煎服一劑而乳房通腫亦消矣不
必二劑此方用貝母天花粉者消胃中之壅痰也痰壅
而乳房之氣不通化其痰則胃火失其勢而後以蒲公
英穿山甲解其熱毒利其關竅自然不攻而自散矣又
恐前藥過于迅逐加入當歸甘草補正和解正旣無傷
而邪又退舍矣此決不致火毒不行而變爲乳岩之病
也哉

人有先生乳癰雖已收口後因不慎房事以致復行潰爛

變成乳岩現成無數小瘡口如管非管如漏非漏竟成蜂窩之狀肉向外生終年累月而不愈服敗毒之藥身愈狼狽而瘡口更加腐爛人以爲毒深結于乳房也誰知氣血之大虧乎凡人乳房內肉外長而筋束于乳頭故傷乳卽傷筋也此處生癰原須急散遲則有筋弛難長之虞况又加泄精以損傷元氣安得不變非常乎當時失精之後卽大用補精填髓之藥尙不至于如此之橫今旣因虛而成巖復見巖而敗毒不已虛而益虛乎毋怪其愈敗愈壞也治法必須大補其氣血以生其精

不必再泄其毒以其病原無毒之可泄耳方用化巖湯
人參一兩白朮二兩黃芪一兩當歸一兩忍冬藤二兩
茜根二錢白芥子二錢茯苓三錢水煎服連服二劑而
生肉紅潤再服二劑膿盡痛止又二劑漏管重長又二
劑全愈再二劑永不再發此方全去補氣血不去消毒
實爲有見雖忍冬藤乃消毒之藥其性亦補况同入于
補藥中彼亦純于補矣惟是失精變岩似宜補精乃不
補精而止補氣血何也蓋精不可以速生補精之功甚
緩不若補其氣血轉易生精且乳房屬陽明之經既生

乳癰未必陽明之經能多氣多血矣補其氣血則陽明之經旺自然生液生精以灌注于乳房又何必復補其精以牽掣參芪之功乎此方中所以不用生精之味耳人有左乳內忽大如桃復又不痛色亦不赤身體發熱形漸瘦損人以爲痰氣之鬱結孰知肝氣之不舒夫乳屬陽明乳腫宜責之陽明胃經而謂之肝病者蓋陽明胃土最畏肝木之尅肝氣不舒而胃氣亦不舒矣蓋胃見肝木之鬱惟恐肝旺來尅于是胃亦畏首畏尾伏而不揚况乳又近于兩脇而兩脇正肝之部位也與肝相遠

尙退縮而不敢舒與肝爲憐亦何敢恣肆而吐氣哉氣不舒而腫滿之形成氣不敢舒而畏懼之色現不痛不赤正顯其畏懼也治法不必治陽明之胃但治肝而腫自消矣方用逍遙散加味治之柴胡二錢白芍五錢當歸三錢陳皮五錢甘草一錢白朮三錢茯神三錢人參一錢川芎一錢瓜萐三錢半夏三錢水煎服十劑而內消矣去瓜萐再服十劑不再發逍遙最解肝氣之滯肝氣一解而胃氣自舒况益之瓜萐半夏專能治胸中之積痰痰去而腫尤易消也

婦人產後細小兩乳又下垂過小腹痛甚以爲乳癰孰知胃血之燥也夫胃爲水穀之海血之腑也產後亡血過多則胃中空虛而飲食又不能遽進卽進飲食而各臟腑取給于胃甚急則胃氣困矣胃氣困而胃血益燥矣胃血益燥無以解各臟腑之紛爭而子又索母之乳內外取資胃無以應乳房者胃之外廓也乳頭者胃之門戶也胃苦內之紛爭欲避出于外而不可得而外又不免於兒口之吮咂細小下垂以至于腹有逃遁難藏入地無門之狀此倒懸切膚之痛至危之病也治法急救

其胃氣而益之補血之味則胃氣生而胃不燥內足以
分給于臟腑又何至外痛而倒懸哉方用解懸湯治之
人參二兩當歸四兩川芎二兩荊芥三錢益母草三兩
麥冬一兩炮姜一錢水煎服四劑而乳頭收再四劑全
愈此方人參生胃氣于無何有之鄉用當歸川芎于乘
危至急之地用荊芥益母草分解各臟腑以歸其經絡
用麥冬炮姜者因陽明胃火之燥未免火動而炎燒產
後不便大用寒涼故用麥冬微涼之品少解其火勢之
烈也

肚癰門 則

人有生癰於小腹間斷無陽毒之症以其地屬陰之部位也陰生陰毒似乎至重然而純陰無陽一用陽藥立可成功無奈世人一見肚腹生癰多用陰藥以消毒反致成難救之病爲可憫也然予所謂陽藥者非散火祛風之藥乃補氣溫火之味耳蓋陰地結成陰毒者乃寒虛之故寒因虛而不行毒因寒而鬱結用熱藥以祛寒自能解寒而散毒也方用辟寒救腹丹白朮三兩茯苓三錢肉桂三錢金銀花三兩附子一錢當歸二兩蛇牀子

五錢水煎服一劑而肉消矣倘已潰者三劑而膿盡肉生矣四劑亦必全愈此方用白朮爲君者以白朮專利腰膺之氣也腰膺之氣利則下腹之部位盡利矣而後以金銀花蛇牀子祛其毒氣則毒氣易消然恐寒極不能直入故又加附桂斬關突圍而進也惟是桂附朮牀俱是一派乾燥之物邪雖祛除未免耗血故用當歸陽中之陰少制其橫則陰寒漸散而又無陽旺之虞所以既能奏功纔免後患也

多骨癰門 一則

人大腿傍邊長強穴間忽然疼痛高腫變成癰疽之毒
久則肉中生骨以鐵鑷取出已而又生世人以爲多骨
癰也孰知濕熱毒之所化耳夫多骨癰之生因人食生
果濕熱所成者也治之早服一二劑便可解散無如因
循失治與治不得法者遂至濕壅而添熱熱盛而化骨
日久遷延臥床而不能起也說者謂初起之時未嘗有
骨可以內散既生骨之後必須爛骨外取未可全望其
解散也而孰知不然蓋多骨之症無形之所化非肉中
真生骨也乃似骨而非骨耳真骨難化似骨又何難化

之有治之法利其濕清其熱而主之補氣補血之藥不
必消骨而骨自消矣方用五神湯茯苓一兩車前子一
兩金銀花三兩牛膝五錢紫花地丁一兩水煎服一劑
輕二劑又輕三劑而骨消矣四劑而瘡口平五劑全愈
此方用茯苓車前以利水紫花地丁以清熱又用金銀
花牛膝補中散毒安得不奏功哉

惡疽門 一則

人有四肢之間或頭面之上忽然生疽頭黑皮紫疼痛異
常此陽症之毒也治不得法亦能殺人蓋陽症之毒其

勢甚驟不亟用散毒之藥則養成大橫蔓延難收小毒變成大毒然而疽與癰實有不同癰潰于內疽腫于外也潰于內難于外治腫于外易于內消雖癰疽之毒盡由內而外發無不可治內而外愈而疽病尤宜內治也方用消疽散生地三錢連翹三錢忍冬藤一兩白芷三錢夏枯草一兩地榆三錢天花粉三錢生甘草二錢當歸一兩水煎服未潰二劑則消已潰四劑全愈此方通治惡疽之方凡生疽者以此方投之無不神效蓋補血散毒則血活而毒難留涼血清火則血寒而火易散疽

多陽症所以治無不宜也

疔瘡門 一則

人有生疔瘡者一時疼痛非常亦陽毒也但初生時人最難辨世人以生黃豈令病人嚼不知辛生之味便是疔瘡以此辨之不錯其瘡頭必發黃泡中或現紫黑之色更須細看泡中必有紅白一線通出于泡外大約疔生足上紅線由足而入臍疔生手上紅線由手而入心疔生唇面紅線由唇面而至喉如見此紅線之絲在其紅線盡處用針刺出毒血則免毒攻心若現白線之絲則

不必刺也治法總以消毒瀉火爲主世人戒用官料之藥此不知醫之語毒非藥安除哉方用拔疔散紫花地丁一兩甘菊花一兩水煎服一劑而紅線除二劑而疔瘡散三劑全愈又何必外治挑開疔頭之多事哉若已潰爛亦用此方但加當歸治之必須二兩亦不必四劑毒盡而肉生也

楊梅瘡門 五則

凡好嫖者戀鑪酣戰自覺馬口間如針戳之痛此毒氣已起也未幾而生魚口矣未幾而生疳瘡矣又未幾而遍

身生瘡矣黃膿泛濫臭腐不堪世人皆以爲毒盛多用敗毒之藥孰知日敗毒而毒愈盛瘡愈多而不易愈往往有腐爛者日用敗毒之劑其瘡不能收口須知此症于泄精之時泄精則元氣虧損故毒乘虛而入若元氣大旺毒難深入卽有傳染不過輕微之毒可一泄而愈今遍身無非毒瘡明是大虛而毒深中也不補虛以瀉毒烏能奏功乎倘上服敗毒之藥無異于以石投水矣方用二生湯生黃芪三兩土茯苓三兩生甘草三錢水煎服連服四劑而瘡漸紅活再服四劑而盡乾燥又服

四劑全愈此方之妙全不去解毒止用黃芪以補氣氣
旺而邪自難留得生甘草之化毒得土茯苓之引毒毒
去而正自無虧氣生而血又能養此治法之巧而無如
世人之未識也可勝嘆息云

人有龜頭忽生疳瘡服敗毒之藥毒盡從大小便出倘大
腸燥結則敗毒之藥不能徑走大腸勢必盡趨小便而
小便口細毒難罄泄于是毒不留于腸中而反單結于
外勢毒盛必發安能不腐爛哉往往龜頭爛落連龜身
亦爛盡矣世人多以外藥敷之雖外藥亦不可少然不

先消其火毒而遽用外藥以止遏不管如石之壓卵也
故必先用湯治之方名散毒神丹黃柏三錢茯苓一兩
生甘草三錢炒梔子三錢肉桂一錢水煎服連服四劑
則火毒自從小便而出疼痛少止然後用生勢丹敷之
炒黃柏三兩兒茶一兩水片三分生甘草一兩大黃三
錢乳香一錢沒藥一錢射香三錢丹砂一錢不煨各爲
絕細末和勻滲之滲上卽止痛逢濕卽滲末不數日膿
盡血乾肉筋再長一月全愈但不能再長龜頭也愈後
須補氣血用十全大補湯連服一月或兩月則外勢仍

能伸縮尙可種子否則多服敗毒之藥又用泄火之劑
無論命門寒冷而外勢亦且冰冷安得陽和之驟復哉
此先後治法之各異實有次序也

人有疳瘡初發魚口將生苟不急治必遍身生瘡遷延歲
月腐爛身體多不可救故必須早治爲妙然早治之法
世人多以五虎散敗毒雖毒亦能往下泄而損傷元氣
正不少也未爲得法設或敗毒之藥少減又恐有留毒
之患亦未爲治法之妙蓋毒氣之入因元氣之虛也因
虛而感毒又敗毒而重虛毋論毒盡不泄已犯虛虛之

戒況只敗毒毒更難散也治之法宜于補中攻泄則毒
既盡出而正又無虧方用早奪湯人參一兩生黃芪一
兩茯苓一兩當歸一兩遠志三錢生甘草三錢金銀花
一兩大黃一兩石膏一兩柴胡二錢白朮一兩天花粉
三錢水煎服一劑而大瀉惡物臭穢不堪急掘土埋之
再服二劑而臭物惡穢無留于腸胃矣後可減去大黃
石膏加土茯苓二兩同煎藥再煎服四劑則一身上下
與頭面之間必有隱隱瘡影現于皮膚之內再服二劑
瘡影亦漸消矣再二劑永不生矣此方用大黃以泄毒

用石膏以清毒用甘草金銀花以化毒用柴胡天花粉以散毒非多助之以大補氣血之藥妙在用參芪歸朮之類自獲全勝此等之方余實親視而親驗者也倘病人陰虛陽燥方中可加熟地數兩或加玄參一兩亦可餘品不可亂加也

人有遍身生楊梅之瘡因悞服輕粉一時收斂以圖目前遮飾豈知藏毒于內必至外潰未幾而毒發于鼻自覺一股臭氣冲鼻而出第二日鼻色變黑不聞香臭矣此等症見斷須急治否則鼻柱自傾一至腐爛便不可救

雖急治而用些小之劑亦正無益毒氣已盛非杯水可濟也况楊梅結毒不結于他處而結于鼻中其毒更勝此毒不在他臟而在肺經也肺氣清氣也毒氣非清氣可比毒氣在肺則清氣盡爲毒氣矣肺氣出于鼻而藏于腎腎感毒氣移之于肺以散于皮膚則毒氣可以外出今用輕粉收斂則毒發皮膚者盡還肺中肺又歸還于腎而腎不受乃上冲于鼻而鼻孔細小安得遽泄自然毒氣盡結于鼻而鼻乃獨受其禍矣治法必須多藥以解其毒以肺經不能直治必隔一隔二以治之也方

用護鼻散玄參三兩麥冬二兩生甘草一兩生丹砂末
三錢桔梗五錢金銀花三兩天花粉三錢水煎調丹砂
末服一劑而鼻知香臭矣連服四劑鼻黑之色去不必
憂鼻梁之爛落矣更用全鼻散玄參一兩生甘草三錢
金銀花一兩當歸一兩麥冬五錢人參三錢生丹砂末
一錢水煎服十劑而一身之毒盡出可保無虞前方過
于勇猛所以救其急後方近于和平所以補其虛而丹
砂前後皆用者以輕粉之毒非丹砂不能去輕粉乃水
銀所燒而丹砂乃水銀之母子見母自然相逢不肯相

離丹砂出而輕粉亦出此世人之所未知耳倘鼻柱已傾肉腐不堪將前護鼻散救之雖鼻不重長而性命可援亦不致死亡也

人有生楊梅瘡遍體皆爛疼痛非常人以爲毒氣之在皮膚也誰知是血虛而毒結于皮膚耳夫楊梅之瘡發于骨髓之中毒在骨難於醫遼毒在皮膚似易于施治矣然毒未出于皮膚其毒蘊藏瀉骨中之毒可從下而外泄毒已出于皮膚其毒開張歛肌中之毒不可由表而入攻得其法則易泄散未得其法則轉橫也故治之法

補其血瀉其毒引之而盡從小便而出始得其治法耳
方用二苓化毒湯白茯苓一兩土茯苓二兩金銀花二
兩當歸一兩紫草三錢生甘草二錢水酒各半煎服十
劑全愈并無回毒也此方視之平淡無奇而實有異功
者補以瀉之也楊梅本生于腎之虛腎虛則血虛矣不
補虛以治瘡反瀉毒以耗血此世人治梅瘡所以多不
效

附梅昆璧治楊梅瘡水藥方

金銀花 防風 歸尾 紫花地丁 川萆薢

川牛膝 甘草梢 金蟬蜋 羌活 威靈仙

連翹 赤芍 白蘚皮 何首烏

以上各一錢

土茯苓

一兩

瘡在頭上加荆芥白芷各八分瘡在下部加木

瓜木通

各五分

瘡在頭上下部荆芥白芷木瓜

木通併用 右水煎服十劑日服一劑先將鮮

猪肉淡煮湯服藥後卽以淡肉湯一碗壓之令

瀉下惡物每出大便卽在空地上挖一土坑瀉

入坑內卽將泥土掩蓋好恐其毒氣傳入爲害

非淺

腰疽門 一則

人有腰眼之間忽長疽毒疼痛呼號似乎陽症然腰腎乃至陰之地未可作陽疽治之若竟作陽症治大不宜也此症雖本于過忍其精欲泄不泄以成斯毒似乎純是陰分之過但腰間雖不遠于內腎火發而毒成則陰中有陽未可純以陰症治之必須合陰陽并治之化其毒則毒去如掃倘不補陰而竟治其毒則腎氣愈傷而毒難連化卽補陰而不補陽則陰無陽不生毒且深藏于

腎宮而不得外泄矣方用兩治散白朮一兩杜仲二兩
當歸一兩金銀花三兩防已一錢穉蒼草三錢水煎服
一劑而痛輕二劑而痛止三劑全愈此方用朮杜仲以
利其腰膺氣通而毒自難結也又得金銀花當歸之類
補中有散而防已穉蒼直入腎宮以祛其濕熱之毒陰
陽無偏勝之虞邪正有解分之妙自然一二劑成功非
漫然僥倖也

擎疽門 一則

人有手心之中忽然紅腫高突變成一疽疼痛非常晝夜

無間世人所謂孽疽也人生此疽多因冤家債主相尋
內外治療往往不能收功有流血而至死者似乎不必
治也然而有病無方又安見吾道之大乎苟肯懺悔於
臨時怨艾于將死安在不可救乎況此疽之生雖是冤
孽亦因病人有火熱之毒乘機而竊發也故消其火熱
之毒何不可奏功耶惟是火熱非起于一朝而解毒難
憑於小劑蓋毒成于熱而熱起于火火之有餘終是水
之不足不大料以滋水惟小劑以滅火安得取勝乎治
法必須大用補水之劑而少佐解毒之味則孽疽自愈

矣方用釋擎湯玄參二兩生地一兩金銀花二兩當歸
一兩紫花地丁五錢貝母二錢水煎服一劑而痛輕二
劑而痛止已潰者再服四劑未潰者再服一劑無不全
愈愈後仍須懺悔則無後患苟遷善不誠改過不勇未
必不變生他病非此方之過也若論此方滋水以治火
補正以解毒自居于無過之地又何擬議哉

脚疽門 二則

人之脚指頭忽先發癢已而作痛指甲現黑色第二日脚
指俱黑三日連足面俱黑黑至脚上脛骨卽死此乃無

名腫毒得之多服春藥是火熱之毒非腳疽可比若腳
疽止黑在腳指而不黑至腳面也然腳疽最凶雖不如
無名腫毒之橫而速殺人則一也蓋腳爲四餘之末宜
毒之所不到何以及凶惡至此正以毒所不到之處而
毒聚不散反出于指甲之間則毒盛非常而治之轉不
可輕視然則用泄毒之藥順治之可矣而孰知不然凡
人身之氣盛則周流于上下毒斷不聚于一處惟氣血
大虧不能通行夫經絡而火毒惡邪乃固結於骨節之
際腳疽之生正氣血之虧不能周到之故然則烏可單

泄毒以重傷其氣血乎治法必須大補氣血而加之泄
毒之味則全勝之道也方用顧步湯牛膝一兩金釵石
斛一兩人參三錢黃芪一兩當歸一兩金銀花三兩水
煎服一劑而黑色解二劑而疼痛止三劑全愈若已潰
爛多服數劑無不愈也此方用金銀花以解毒非用牛
膝石斛則不能直達于足指非用人參歸芪亦不能氣
血流通以散毒也故用此方治脚疽多效卽是無名腫
毒用此方治之亦可得生世醫有用刀切去脚指亦是
治法然不若用此方于補中敗毒起死爲生旣無痛楚

之傷又有全活之妙也

人有脚腿之上忽然腫起一塊其色如常復又不痛人以爲癰疽也孰知是氣虛之故乎夫癰成于腫未有腫而不變爲癰者予獨謂氣虛而非癰人誰信之嗟乎氣所以行血者也氣行則血行氣血兩行總有邪氣斷難成腫邪氣之盛由于氣血之衰其腫爲癰每每作痛而色必變爲紅赤也今旣不痛而色又不變是有腫之名而無腫之實全是氣虛而無以養非邪盛而氣不能制也治法止補氣以扶正不須化毒以祛邪方用補中益氣

湯人參五錢白朮一兩生黃芪一兩當歸五錢柴胡一錢升麻五錢陳皮一錢生甘草二錢半夏二錢茯苓三錢水煎服十劑而腫自消補中益氣湯補氣之聖藥非消毒之神劑何以用之而腫消耶蓋真氣奪則虛邪氣盛則實真氣既虛邪氣益盛不用補氣之藥氣何以行而腫何以化耶補中益氣湯善能補氣所以卽能消腫也况又益以化痰去濕之品乎故更易收功耳

鬢疽門 一則

人有兩鬢之中忽然生痘紅腫高突數寸頭面眼鼻俱浮

其狀不堪異乎平常相貌此陽毒也蓋兩鬢近于太陽乃陽之位也陰氣不能到此部位故兩鬢生疽當作陽症治之然是陽症往往有變爲陰症者所以陽藥中必加入陰分之藥以豫防其害若已潰破腐更須陰藥多于陽藥消息而善治之也今有一方名曰理鬢湯治未潰已潰未爛已爛無不收功方用金銀花三兩白芷二錢川芎一兩當歸一兩夏枯草三錢水煎服未潰者二劑卽消已潰者四劑全愈此方用金銀花夏枯草以解火毒用白芷川芎以引入兩鬢太陽之間則金銀花夏

枯草更得施其祛逐之功又妙在當歸之補氣血陰陽
雙益正足而邪自難變安得不速愈哉

唇疔門 一則

人之唇上生疔瘡者或在口角之旁或在上下唇之際不
必論其大小大約皆脾胃之火毒也最宜速散否則毒
氣熾炎必且艱于飲食往往有腐爛而死者疔瘡毒愈
小而愈橫也治法宜急泄其火毒而又不可損傷脾胃
之氣則毒不難散矣方用救唇湯紫花地丁一兩金銀
花一兩白菓二十箇桔梗三錢生甘草三錢知母一錢

水煎服一劑而疼痛止二劑瘡口消三劑全愈若已腐爛者五劑自然奏功此方治頭面上之疔瘡俱可獲效而治口唇之疔更能神驗此方有白菓桔槔善走唇口引金銀花紫花地丁至于生瘡之處一概盡去其毒也

療癰門 二則

人有生痰塊於頸項堅硬如石久則變成癰癰流膿流血一塊未消一塊復長未幾又潰或耳下或缺盆或肩上下有流出患走之狀故名鼠瘡又名串瘡言其如鼠之能穿也世人謂其食鼠竊餘物以成此症而不盡然也

蓋癰瘰之症多起于痰而痰塊之生多起于鬱未有不鬱而能生痰未有無痰而能成癰瘰者也故治癰瘰之法必須以開鬱為主然鬱久則氣血必耗况流膿流血則氣血更虧徒消其痰不解其鬱但開其鬱而不化痰皆虛其虛也不能奏功方用消串丹白芍一兩白朮一兩柴胡二錢天花粉三錢茯苓五錢陳皮一錢附子一片甘草一錢蒲公英三錢紫貝天葵五錢水煎服連服八劑而痰塊漸消再服十劑而癰瘰盡化再服一月全愈愈後可服六君子湯以爲善後之計斷不再發此方

妙在蒲公英與紫貝天葵爲消串之神葯然非佐之以
白芍柴胡則肝木不平非輔之以白朮茯苓則脾胃之
土不健何以勝攻痰破塊之烈哉惟有攻有補則調濟
咸宜得附子之力以引羣藥直搗中堅所以能愈宿疾
沉痾於旦夕耳

人有久生瘰癧兩頸之間盡多潰爛胸膈之上無非痰塊
已有頭破欲腐者遂至身體發熱發寒肌肉消瘦飲食
少思盜汗自汗驚悸恍惚此等症原係難醫然治之有
法尙可救也大約瘰癧初起宜解鬱爲先而佐之補虛

以消其毒倘執尋常治法以祛痰敗毒爲事鮮不速死
方用轉敗丹人參二兩柴胡二錢白芍三錢金銀花三
兩當歸二兩半夏五錢白朮一兩生甘草三錢水煎服
四劑而胸間之痰塊盡消再服四劑而頸上潰爛亦愈
將前方減半再服十劑瘡口悉平不再發也此方補多
于消而開鬱寓于中化痰存其內世人從未有知此法
者但一味攻毒所以愈攻而愈壞也曷不以此方試之
哉殺運無窮神力難信世見此等治法無不驚走辟易
否則且有刺譏訕笑摘吾方之過奇謂大言不慚何可

爲訓孰知却是祛病之仙奪命之異藥哉予不勝掩卷而三嘆也

痔漏門 四則

人有肛門內外四旁忽然生長紅瘰先癢後疼後成爲痔日久不愈此症皆濕熱所成也而得之故縱飲者爲多江南人常生此症因地氣之濕熱又加酒熱之毒所以結于肛門邊不能遽化夫肛門通于大腸凡有濕熱亦隨大便出何以積而成痔以濕熱在大腸不能久留勢必盡趨于肛門而肛門爲大腸鎖鑰未免有關閉防範

之意不容濕熱直出于門外蓄積久濕熱毒肛門獨受之矣有毒必然外形不生痔于肛門之內必生痔于肛門之外雖內外似乎少殊而作楚則一也然治之法烏能舍濕熱而他求乎惟是肛門去脾胃甚遠化濕熱之毒不能不假道于脾胃肛門未必受益而脾胃先損所以無成功耳故用藥必須無損于脾胃而有利于肛門者治之始克奏功方用益後湯茯苓一兩白芍一兩地榆三錢穿山甲一片土炒爲末山藥一兩薏仁一兩水煎連服四劑而肛門寬快又四劑內外之痔盡消再將

前方每味加增十倍修合丸散以密爲丸每日未飲之
先滾水送下五錢服一料自然全愈不再發也此方利
水去濕熱旣無傷脾胃復有益肛門蓋兩得之也

人有肛門邊先生小癰每因不慎酒色遂至腐爛變成痔
漏瘡不能收口後長生肉管每歲一管流膿淌血甚至
爲苦世人治法多用刀針掛線徒受苦楚而內毒未除
外口難長經年累月難以奏功豈果漏瘡而終不可治
乎抑酒色之戒不嚴而治之不得其法蓋肛門之肉不
比他處之肉而肛門之皮亦不比他處之皮他處之皮

肉非橫生則縱生也惟肛門之皮肉有縱有橫最難生
合況大便不時出入又加以刀針掛線切勿輕用惟消
其濕熱之毒內治爲佳然而漏生旣久毋論漏不可止
而氣血反傷終難奏效也方用補中用消則何漏之不
可痊哉方用青龜丸烏龜一個茯苓五兩薏仁六錢羊
蹄後爪四副穿山甲五錢俱用土炒人參二兩青苔乾
者一兩黃芪八兩當歸三兩瓦松二條陰乾不可火焙
白芷一兩槐米一兩各爲細末將龜用石臼搗死以藥
末拌之飯鍋內蒸熟將龜肉與甲火焙乾爲末同前藥

用蜜爲丸每日服三錢服至一月而漏瘡乾服至二月漏瘡滿服完全愈不再發但服藥時務必獨宿戒酒色三月倘服藥時不斷酒色不能奏功不可不慎此方治漏竇有神效非世上大概之方况雖去濕而復不散氣雖敗毒而又不損血補破于無形填隙于有孔我願人敬服此方堅守三月之戒以去十年之病也

人有大便時先射血幾許而始溺糞者人以爲便血病也誰知肛門暗生血痔乎夫痔久必變爲漏宜流膿血不知受病不同而見症亦異此等之症多得之飲燒酒過

多熱走于直腸而不得遽泄乃結成小痔不化久則皮破而血出此血乃外出于直腸之外而非出于直腸之中乃膀胱之血也夫膀胱化氣而不化血酒毒滲入膀胱將酒氣化水出于陰器而酒毒燥血不能從陰器而出勢不得不趨大腸肛門而出矣無奈門徑各別戶口牢關無可出路而酒毒結于直腸之外毒向內攻而直腸之痔生矣痔生必破乘隙而膀胱之血注之久且以血引血不獨膀胱之血盡歸之也乘大便之開關血先奪門而出故先大便而出射正見其欲出之速耳治之

法似宜急填其隙使血出之無路爲第一策然私竇既開漏卮易洩不亟清其上游之源而但截其下流之隙非計之善也方用清源散黃連三錢茯苓五錢白芍五錢葛根二錢白芷三分槐花三錢地榆三錢人參三錢川山甲土炒爲末一錢白朮五錢車前子二錢三七根末三錢水煎調末服三劑血較前更多三劑後減去黃連再用三劑血止而痔愈矣愈後必務斷酒終身不可服也若女色止忌三月永不再發尙不能禁不必爲之治療必先說過而後醫也此方妙在用黃連之多以解

酒熱之毒所謂先清其源也上游無病而下流自然安閒况諸藥又分配得宜無非去濕化熱之味堵截之方又何能加于此哉

人有胸間生瘡因不慎酒色遂成漏竅長流血液久則神形困憊腰痛難伸行同偃僕人以爲心漏也孰知是腎虛而成漏乎夫心腎本相通也心之氣必得腎之氣以相生腎之氣必得心之氣以相閉心漏之成于腎氣之泄也欲心漏之愈安可不急治其腎氣之衰乎然而治腎而心之氣不閉則補腎與不補同蓋有出氣而無止

氣耳或謂凡漏瘡多成于濕熱但補腎而不閉心之竅則漏不能愈閉心之竅而不去其濕熱而但治其心腎恐漏亦不能愈也然漏亦不同也漏在他處者可泄其濕熱而漏在胸間者不可泄其濕熱蓋心漏成于腎虛腎虛則寒而非熱也腎虛者腎水虛而非邪水盛也治之法補其真陰而邪水自消溫其腎寒而濕熱自退方用溫腎丹鹿茸二個附子二個青鹽二兩人參二兩瓦葱二枝紅棗四兩各爲末紅棗煮熟搗爲丸每日空心酒下三十丸服半月而腰痛減服月餘而心漏愈矣此

方之奇全在鹿茸既能益腎中之水火而更能補心中之缺陷又加之附子之辛熱則無經不達引鹿茸直入于心腎以填補其空竅如青鹽者鹹以耐堅也蓋漏瘡必多竅孔故流血亦多血得鹽則止而不流也瓦蔥者消濕熱于無形雖心漏非濕熱之病然未免少有留存則孔竅難塞故兼用以防其變誠恐氣虛不能化更益以人參生氣于心腎之間助茸附之力通達于上下尤易成功也

人有久生惡瘡或在手足或在胸背或在頭面終年經歲而不愈臭腐不堪百藥罔效外藥敷之不應內藥服之無功世人故謂之頑瘡然瘡雖頑治之當如何蓋人身氣血和斷不生瘡癰間或生之亦旬日而愈其不和者或因濕浸或因熱盛或因濕熱寒邪之交至遂至氣結而不宣血滯而不散結于皮而皮生瘡結于肉而肉生瘡久則膿血不爭因而生虫人以爲虫也又用殺虫之藥而反傷其皮肉則氣血愈虛力難兼到棄皮肉于膜外而不顧則瘡成爲冥頑不靈之患矣故治瘡皆以行

氣活血爲主而亟與毒不必計也然而血不易活氣不易行非補氣補血不可蓋氣得補而氣自行于周身血得補而血自活于遍體也方用救頑湯當歸一兩黃芪一兩白朮一兩生甘草三錢熟地一兩山茱萸五錢麥冬一兩柴胡一兩茯苓五錢半夏二錢防風一錢連翹一錢附子一片水煎服連服二劑而瘡口必然發腫斷不可懼從前無效今服藥發腫乃藥助氣血與瘡相戰也乃速愈之機再服二劑不痛而癢矣再服二劑癢止而肉生矣再服二劑結靨而愈再服二劑不再發此方

單去活血行氣得補之力也氣行血活虫將安寄故不必殺虫而頑瘡自盡愈矣

人有內股生瘡歛如荳許翻出肉一塊宛如菌狀人以爲虫蝕外翻也孰知是肝經風熱血燥之故乎夫肝熱則生風此風乃內風而非外風也外風清涼而內風蘊熱故外風宜散而內風宜清然但清其風而不補其血則熱不可解而風不可舒也必須養血之中而益之清熱之味則燥不能燥熱退而風自靜矣方用清風湯白芍一兩人參五錢當歸五錢白朮三錢炒梔子三錢甘草

一錢川芎二錢丹皮三錢沙參三錢柴胡一錢天花粉
三錢連翹一錢水煎服一連數劑瘡口自斂此方滋血
以養肝非消肉以化毒然何以瘡斂而愈也蓋瘡成于
肝木之旺平肝而血無過燥之虞自然風散而熱無炎
燒之禍也苟不平肝而內用降火之品外用追蝕之法
則蝕而又翻翻而又蝕其肉益大而氣愈虛變出非常
正難救援耳

接骨門 二則

人有跌傷骨折必須杉木或杉板將已折之骨湊合端正

用繩縛住不可偏邪歪曲緊緊又用布紮無使動搖萬不可因呼號疼痛心軟而少致變動輕鬆反爲害事收拾停當然後用內服之藥苟或皮破血出尤須用外治之藥也但骨內折而外邊之皮不傷正不必用外治之藥然內外夾攻未嘗不更佳耳內治之法必須以活血去瘀爲先血不活則瘀不能去瘀不去則骨不能接也方用續骨神丹當歸二兩大黃五錢生地一兩敗龜板一兩爲末丹皮三錢續斷三錢牛膝二錢乳香末沒藥末各二錢桃仁三十個羊躑躅一錢紅花二錢白芍一

兩水煎服二劑而瘀血散新血長骨卽長合矣再服二劑去大黃又服四劑則全愈矣外治之法必須用膏藥而加之末藥滲于傷處爲妙膏名全體神膏當歸二兩生地二兩續斷一兩牛膝一兩甘草五錢地榆一兩茜草一兩小蘗一兩木瓜一兩杏仁三錢人參一兩皂角二錢川芎一兩劉寄奴一兩桑木枝四兩紅花二兩白朮一兩黃芪一兩柴胡三錢荆芥三錢用麻油三觔熬數沸用麻布漚去渣再煎滴水成珠加入黃丹末水漂過一觔四兩收爲膏不可太老再用乳香三錢沒藥三

錢自然銅醋浸燒七次三錢花藥石三錢麒麟竭五錢
白蠟一兩海螵蛸三錢爲細末乘膏藥未冷時投入膏
中用桑木棍攪勻取起以瓦器盛之臨時以煨攤膏大
約膏須重一兩旣攤膏藥再入細藥名爲勝金丹麝香
三錢血竭三兩古石灰二兩海螵蛸一兩自然銅末如
前製一錢乳香一兩沒藥一兩花藥石三錢冰片一錢
樟腦一兩土狗子十個地蠶乾者一錢土鼈乾者一錢
人參一兩象皮三錢琥珀一錢兒茶一兩紫石英三兩
三七根末一兩木耳炭一兩生甘草末五錢和勻以礮

盛之每膏藥一個用勝金丹末三錢滲在膏藥上貼之
大約接骨不須二個也重則用膏藥二個此膏此末皆
絕奇絕異之藥倘骨未損傷只消貼一張卽痊不必加
入勝金丹末藥也三方內外治法皆有不可形容之妙
內外同治旦夕卽能奏功世傳得此三方可無憂折傷
之不可救也

人有從高而下墮於平地昏死不甦人以爲惡血奔心也
孰知是氣爲血壅乎夫跌仆之傷多是瘀血之攻心然
而跌仆出于不意未必之動也惟從高下墜者失足之

時心必驚悸自知墜地必死是先挾死之心不比一蹶而傷者心不及動也故氣血錯亂每每昏絕而不可救治之法驅其瘀血而必佐之麝氣之品而血易散而氣易開倘徒攻瘀血則氣閉不宣究何益平方用麝氣湯乳香末一錢沒藥末一錢蘇葉三錢荊芥三錢當歸五錢丹皮三錢大黃一錢桃仁十四粒羊躑躅五分山羊肉末五分白芍五錢水煎調服一劑而氣甦再劑而血活三劑全愈此方麝氣活血兼而用之故奏攻神速方中妙在用羊躑躅與蘇葉荊芥因其氣亂而亂之則血

易活而氣易甦矣

金瘡門 一則

人有殺傷而氣未絕或皮破而血大流或肉綻而腸已出或箭頭入膚或刀斷背指死生頃刻不急救可乎大約金刀之傷必過于流血血盡則發渴渴若飲水立刻卽亡故刀傷之渴斷須堅忍世人有飲水而愈者又是何故蓋其人素有熱病得水卽熱解而不可執之以治凡有傷而渴者也但渴旣不可飲水又將用何藥解渴要不能外補血以救之然而旣補血以止渴刀鎗之口大

傷所補之血仍然外泄血流無止渴之期亦速死之道也故補血之中仍須用止血之藥而止血之內更須用生肉之劑則惡血不致攻心內火不致燒胃庶死者可生破者可完斷者可續也方用完膚續命湯生地三兩當歸三兩麥冬三兩元參三兩人參二兩生甘草三錢三七根末五錢續斷五錢地榆一兩乳香末沒藥末各三錢劉寄奴三錢花蘂石二錢白朮五錢水煎服一劑口渴止二劑瘡口閉三劑斷縫生四劑全愈此方補血加之止澁之味使血之不流肉之易長是也何以又用

補氣之藥蓋血傷不易速生補氣則氣能生血且血生以接肉又不若氣旺以接肉之更易所以于補血之中兼用補氣之藥也然不用參朮未嘗不可建功終覺艱難不速此方凡有刀傷皆可治療但視其所傷之輕重以分別藥料之多寡耳

物傷門 三則

人有爲虎所傷無論牙爪流血必多大約虎傷者多在頸項必有深孔或兩個或四個其孔一時卽變黑色痛不可忍急用生豬油塞之無豬油則用生豬肉填之則肉

入孔中隨塞隨化庶不致所傷之肉再腐然後急買地榆半觔爲末敷其虎傷之處血卽頓止隨用湯藥以解其渴蓋虎傷之後流血必多而虎又有熱毒直來犯心故口渴之甚斷不可卽與水飲萬不得已可與小便飲之急用治虎湯當歸三兩地榆一兩生地三兩黃芪三錢三七根末一兩麥冬三兩水十碗煎數碗恣其暢飲服完必安然而臥明日傷處大癢又服一劑又臥如是五日瘡口生合而愈此方大補氣血以生肌加地榆以化虎毒加三七根止血收口藥料無奇而收功實神妙

也

人有爲蛇所傷或在足上或在頭面或在身腹之間足腫如斗面腫如盤腹腫如箕三日不救則毒氣攻心人卽死矣蓋蛇乃陰物藏于土中初出洞之時其口尙未飲水毒猶未解故傷人最毒治以解毒爲主惟是蛇毒乃陰毒也陰毒以陽葯解之則毒愈熾必須以陰分解毒之藥順其性而解之也方用祛毒散白芷一兩生甘草五錢夏枯草二兩蒲公英一兩紫花地丁一兩白礬三錢水煎服一劑而腫漸消二劑而毒盡從大小便而出

三劑全愈此方白芷雖是陽分之藥得夏枯草陽變爲陰紫花地丁蒲公英甘草白礬之類盡是消毒之味又且屬陰陰藥以化陰毒自易奏功所以助白芷直攻蛇毒而無留餘之害也或問解蛇之毒旣不可用陽分之藥何必又用白芷不知蛇毒正用白芷方能除祛世人不善用之所以有效有不效今用之於陰分藥中自無不效矣又何可舍白芷而另求他藥反致無功乎或又問雄黃亦制蛇毒之品何不用之然而白芷陽中有陰不比雄黃之純陽也雄黃外用可以建奇功而內用每

至債事不若白芷之用于陰中可收全功耳

人有爲癲狗所傷者其人亦必發癲有如狂之症世以爲其人必生小狗于腹中此悞傳也因其發出狂癲有如狗狀見人則咬逢女則黽非狗生于腹中不宜有此景象況人爲癲狗所傷大小便必一時俱閉不能遽出大小便虛用努力似若生產艱難且外勢急痛腰腹作脹而死人以爲腹中生狗不能產而死云腰痛者乃小狗內咬也豈不可笑哉其實狗悞食毒物而發癲亦爲所傷則毒氣傳染於人狗愈而人死矣最可畏之病也然

而得其法以解毒則病去如埽正不必過懼也夫犬性最熱狗食物而發癲乃食熱物之故或食自死之肉或餐熱病之屍多成癲病然則狗發癲狂實熱上加熱也解其熱毒何不愈之有但世人未知解法所以不救耳予逢異授奇方不敢自秘傳以救世焉方用活命仙丹木鱉子三個切片斑貓七個陳土炒去頭足米一撮炒大黃五錢劉寄奴五錢茯苓五錢麝香一分各研細末和勻黃酒調服三錢一劑而毒氣全解至神之方也不必二服七日皆能奏功過七日外必須多服數次無不

可收服藥切忌色慾須二月不行房并忌發物餘無所忌是方用木鱉斑貓者以狗最畏二物也木鱉大涼又能瀉去熱毒得大黃以迅埽之則熱毒難留劉寄奴善能逐血尤走水竅佐茯苓利水更速引毒氣從小便而出也射香雖亦走竅然用之不過制斑貓木鱉使之以毒攻毒耳中有妙理非漫然而用之也

癩門 一則

人有遍身發癩皮厚而生瘡血出而如疥或痛或癢或乾或濕如虫非蟲人以爲濕熱之留于皮膚也孰知是氣

血不能週到滋潤乎世多以苦參煎湯或菰蔞白芷之類外治而終無成效正坐於氣血之虛也蓋氣血足則經絡無閉塞之虞氣血旺則毛竅無乾枯之害且氣足血旺則熱散濕消何至淤滯而不通散結于皮膚之外故治癩之法專以補氣血爲主而佐之消濕散熱之味雖十載沉疴尚可奏功于旦夕矧目前之近癩乎方用掃癩丹黃芪三兩當歸二兩防風二錢茯苓一兩白朮一兩生甘草三錢麥冬一兩金銀花二兩芍藥一兩川芎五錢熟地一兩山萸五錢元參一兩荆芥三錢天花

粉三錢水煎服二劑而皮色潤又服二劑而乾燥解連服十劑全愈此方大補氣血無異枯涸之田一旦忽逢霖雨生機勃勃又何至有塵埃之敝野哉

刑杖門 一則

人之腿受官刑皮肉腐爛死血未散疼痛呼號似宜用膏藥末藥外治爲佳然而受刑深重不急內消專恃外治則逍遙膜外安能衛心使惡血之不相犯乎此內治之斷不宜遲也然而世人外治之方多有神奇而內治之方絕無應驗往往有一時心亂而死者雖犯法遭刑多

緣惡積保無受冤之屈棒乎冤氣在心則肝葉開張肝氣收斂尤善引血入心使無辜之人一旦輕死療治無法是誰之愆鐸求異人特傳一方一受官刑卽時煎服斷無性命之虞服後然後用膏藥末藥外治內外夾攻則瘡口易愈矣內治方名爲衛心仙丹大黃三錢當歸一兩紅花三錢桃仁三十粒生地一兩丹皮三錢木耳三錢白芥子二錢水煎服一劑而惡血散矣不必二劑也然後以膏藥貼之膏方名護心仙丹大黃一兩沒藥三錢乳香三錢白蠟一兩松香五錢骨碎補五錢當歸

一兩三七根三錢敗龜板一兩射香五分各爲細末
板油一兩將白蠟松香同猪油在銅鍋內化開後將藥
藥末拌勻爲膏藥貼在傷處外用油紙包裹再用布纏
住輕者一膏卽痊重者兩膏足矣夾棍傷重大約不須
四個卽可行步無虞矣此二方至神至奇內方便惡血
盡散外方便死肉之速生合而用之又何至損人性命
哉

辨證錄幼科卷之十四

山陰陳士鏞敬之甫醫道公又號朱華子著

會稽陶式玉尚白甫號存齋又號

參訂

驚疳吐瀉門 七則

兒科之病驚疳吐瀉爲多四者又相爲終始大約因疳而成吐因吐而成瀉因瀉而成驚故小兒口內流涎乃疳之兆也起首卽治疳而吐瀉之症不作又何致驚症之生也惟其失治疳症而胃氣受傷矣小兒純陽原無損于陰氣胃氣者傷陽氣也陽傷陰亦傷矣傷陰者傷脾

氣也人生後天以脾胃之氣爲主脾胃兩傷無氣以養心而驚之症起矣是驚乃虛病而非有外風之入也然則吐瀉驚俱脾胃之虛寒而疳乃脾胃之實熱也不知小兒因多食水菓以致口熱而成疳口熱似乎陽旺也然而陽極則變爲陰矣故疳症旣久而作吐正陽變爲陰之驗也可見驚疳吐瀉俱是虛症補脾胃而四病皆易愈也世醫分驚爲風分疳爲熱分吐瀉爲寒亦未深知小兒之症耳孰知單治脾胃之虛而四症不必治而自愈也方用活兒丹人參三錢白朮一錢甘草一分茯

苓二錢陳皮一分巴戟天一錢白芍一錢柴胡二分當
歸五分山查五分神麴三分水煎服一劑而驚疳吐瀉
無不卽安二劑全愈三劑不再發也此方健脾胃又
能平肝使肝亦無鬱滯之患自能疏通土氣變尅土之
肝反爲益土之肝矣脾胃無非生氣而吐瀉自止何至
四肢無養變成角弓反張之急慢驚風哉

一小兒生疳上下牙床盡腫口角涼涎咳嗽不已咽喉腫
痛人以爲疳症脾熱也誰知是胃火之上升乎夫旣是
胃火宜用泄火之藥瀉火而不效者以火過於盛將陽

變爲陰矣故用降火之藥以瀉火而火不降轉至困憊者正內經所謂壯火食氣也蓋少火宜瀉而壯火宜補不補胃以治火反瀉火以損胃安得而不加困憊哉治之法補其胃氣之虛少加息火之味則痞症不治而自愈矣方用平肝湯茯苓三錢白朮一錢陳皮二分神麴五分麥冬二錢元參二錢桔梗一錢蘇葉三分人參三分枳殼二分黃芩三分水煎服一劑輕二劑又輕三劑而痞症愈不必四劑也此方補胃以散火而火自平者以火出于土之中也土健而火藏土衰而火現故補其

土而火藏于下又何至上升于口頰之間乎况方中有解火之味在于補之內則土引火而自歸火亦隨土而自息矣

一小兒生疳之後飲茶水則旺後則不飲茶水而亦吐困弱之極人以爲熱吐也誰知是熱變爲寒而吐乎夫疳症本熱也疳久則寒者以胃土之傷土衰則火旺火旺則土亦衰土益衰而前火之旺自滅火土兩衰安得不寒乎况小兒最喜者生冷也土衰又加生冷自然作吐矣故止吐以健胃爲主單用止吐之藥吾未見其能止

也卽偶止吐于一時未必不動吐于後日惟健胃以止
吐則胃強而吐不再發也方用六君子湯加味用之人
參一錢白朮二錢茯苓二錢甘草一片半夏五分神麴
三分陳皮三分白豆蔻一粒水煎服一劑卽止吐二劑
全愈此方健胃以止嘔治大人尙有成功况小兒乎小
兒嘔吐世人視爲輕症往往不以爲意變成大病而不
可救以胃氣之傷不能生養夫四肢而角弓反張之病
現乃陰虛而成之也今以此方扶其胃氣胃健而飲食
能受旣無嘔吐之傷自有灌注之益又何至有驚風之

病哉

一小兒大吐之後忽然大瀉雖吐止而瀉不肯止倦怠之極人以爲吐變瀉則其氣順矣誰知其氣愈逆乎夫吐乃傷胃而瀉乃傷脾也氣順宜吐止而愈矣今吐止而大瀉乃胃傳於脾矣由腑而入臟是由表而入裏也較吐更甚蓋吐症補胃而可愈而瀉症宜兼補脾雖脾胃有同治之法補胃自必補脾但吐後作瀉則補脾必須補胃也方用生脾助胃湯人參三錢白朮三錢甘草三分肉桂一錢茯苓五錢神麴五分附子一片水煎服一

劑而瀉止二劑全愈倘服之不應不必治之矣此方治小兒之瀉效驗如嚮百人中可救九十彼不應者乃陰陽兩絕之人也非藥之過耳世人見參附如酖毒不敢浪用醫生用之亦輒抵毀自陷於死亡哀哉

一小兒上吐下瀉眼目上視死亡頃刻其狀宛似慢驚風人以爲驚風之症也誰知是脾胃之氣將絕乎小兒至此亦人鬼之關也若作慢風治之用牛黃等丸下喉卽死矣夫脾胃之氣將絕是陰陽之氣欲脫也非急救其氣何能再活救氣之藥舍人參無第二味也世間之藥

無過人參至四五錢以救嬰兒之吐瀉無論近人無此
膽氣卽古人亦無此方法母怪嬰兒之多亡也予逢異
人訓予救小兒垂危之症惟有多用人參可變危爲安
鐸試之無不奇效蓋小兒脾胃虛寒以致上吐下瀉正
至危之症也宜多人參以救之方用安兒至寶湯人
參五錢白朮五錢茯苓三錢巴戟天三錢附子一錢麥
芽一錢枳殼三分檳榔三錢車前子二錢白豆蔻三錢
扁豆二錢蘿蔔子一錢水煎服一劑卽吐止再劑瀉卽
止三劑全愈此方全在用參附之多所以能奪命於將

危以人參能回陽于既絕附子能續陰于已亡也然非羣藥佐之則陰陽不能分清濁而積穢亦不能祛除耳故用參朮以補氣少少祛除自能奏功否則烏可已傷而再傷已絕而重絕乎世人但尙祛除全不識補中用攻之法所以勞而無功也

一小兒吐瀉之後角弓反張時而驚悸捧搐人以爲驚風之病也誰知非風也乃肝尅脾胃之土而土氣欲絕耳此時萬不可治風一治風以定驚則立刻亡矣蓋既經吐瀉則陰陽兩亡所存者幾微之氣耳不急救脾胃以

續氣反散風邪以損其氣欲不趨于陰得乎且脾胃欲
絕補脾胃之土而不補命門心包之火則土寒而陽不
可以遽回陰不可以驟長故必須補火以生土補土以
止驚方用續氣湯人參一兩白朮一兩巴戟天五錢肉
桂一錢生棗仁三錢遠志二錢茯苓五錢乾薑三分附
子三分半夏一錢水煎服一劑安二劑更安三劑全愈
此方以十歲爲準每歲減二分毋論慢驚急驚以此方
投之無不立效蓋急慢驚風俱是虛症非急爲風而慢
爲虛也世人以驚爲風悞矣不作風治則十人九活一

作風治則十人十死以虛而兼風治則十人八死以大
虛治而絕不治風則十人十活也喻嘉言謂驚風二字
乃前人鑿空之談勸行醫者絕口不道其言雖過于憤
激然亦深憫小兒之悞死于非命不得不大聲以救之
也但喻嘉言所立之方尙兼風治猶未洞悉底裏不若
直補土以救驚補火以生土也

一小兒驚症有慢驚急驚之分世以急驚屬之風慢驚屬
之虛以此區別治療生者頗多似乎其說之不可易矣
誰知似是而非亦殺人之說也蓋小兒從無有驚風之

症此岐天師之所未定而雷公之所不論者也驚風二字乃末世之醫創言以殺小兒者也自此言出殺小兒不啻數百萬矣小兒何嘗有風一作風治千人千死嗟乎天心仁愛何爲使小兒不識不知任其天蕩耶鐸授異人之教救小兒驚症絕不治風無論急驚慢驚以人參湯調服立刻奏功不敢自秘罄書竹簡以聽世人公用人參三兩白朮半觔茯苓三錢半夏一兩廣木香三錢柴胡一兩檳榔五錢荊芥炒黑五錢白芍三兩山查一兩枳殼一兩麥芽五錢神麴一兩甘草一兩乾薑一

兩麥冬去心一兩石菖蒲五錢薄荷葉五錢各爲細末
蜜丸如龍眼大凡遇急慢驚症用一丸以人參三錢煎
湯泡開送下無不全活方名保赤定驚丹輕者一丸重
則二丸無有不愈者也泡開必須用人參煎湯多多益
善若不用人參效驗不能十分之捷然亦可免死亡之
兆也願世人共佩吾言萬勿執驚症爲風症忍爲殺人
之醫也

便蟲門 二則

小兒便中下寸白蟲或蛭蛔之蟲或吐出長短之蟲種種

不一人以爲濕熱之蟲也誰知是脾胃之傷乎小兒最喜食生冷之物自然濕熱無疑然而脾胃氣健雖有濕熱自易分消惟是脾胃之氣傷則難于運化不生津液而生虫矣倘徒治虫而不補其脾胃則脾氣不能消胃氣不能化虫且安居無恙矣夫何益哉惟補其脾胃之氣則氣旺而自能治虫再佐以殺虫之藥虫將何隙以逃生乎此治之法必須補中用攻也方用治虫丹白朮三錢茯苓三錢白朮一錢枳榔五分史君子十箇枳殼五錢白芍三錢甘草三分白薇二錢黃連二分半夏五

分水煎服二劑而虫盡化爲水矣但服藥之後務須忌飲湯水茶茗此方殺虫之藥雖多然入之健脾平肝之劑內則正氣無傷而虫又殺盡乃兩得之道也

小兒有糞門邊拖出長虫不肯便下又不肯進入直腸之內不痛不癢人以爲虫口咬住也誰知乃崇憑之乎夫虫口咬住必然作痛今安然如故豈虫口之自咬耶虫既不咬宜隨糞而俱下今不下而留半截于中非崇憑而何病既崇憑宜非藥物可治然而人有一念之悔心醫卽有一種之治法使人苟遷善而求醫無術又何以

見吾道之大哉況父母未有不愛其子者見其子生而
之異未必不疑自身之譴尤而畏鬼神之作祟或告天
而代爲請禱或信佛而自訴祈求然而醫無以應之不
幾阻人改過之門乎鐸得異人之傳用藥外點虫身則
立刻化爲水方名點虬丹水銀一錢冰片一錢礪砂一
分雄黃三分樟腦一錢輕粉三分白芷一錢薄荷葉三
分各研絕細末以不見水銀星爲度水調少許點虫頭
或身上少刻卽盡化爲水但點藥之時必虔拜上天然
後點之則驗否則或驗或不驗也不須內服煎藥至奇

之方也余恐負異人之傳故罄書之辯證論後異人者
余遊南嶽所逢道士自號雷公狀貌殊異傳鐸活人錄
奇方最多此方其一也

痘瘡門 十五則

小兒將出痘身必發熱口必發渴眼必如醉此時當以表
藥散之則火毒大解無如世人未敢信爲出痘因循數
日見點而始用表散有形之解與無形之解大有不同
所以輕變重而重變死也雖然見點不用表藥則火毒
又將安解豈不藥得中醫而可望其自愈乎不知能審

用表散之藥正自有功耳大約痘瘡初出之時不可不用表散之藥而又不可全用表散當于補中表散之則正氣無傷而火毒又可盡解也方用至慈湯人參三分荊芥炒黑三錢生甘草一錢柴胡一錢當歸三錢茯苓二錢陳皮三分麥冬二錢元參三錢天花粉一錢水煎服一劑火毒少除二劑火毒全散不必三劑也若已見點則重變輕而死變生矣此方正用柴胡荊芥以疏通其表裏得元參以去其浮遊之火得生甘草以敗其毒妙在人參歸冬之類俱是補氣補津之味佐前藥以充

其使無壅閉之憂以速其至隱之火毒也世人治痘
一見用補無不驚懼誰知火毒非補萬不能由內而發
于外能于補中用表散之法何愁小兒之不盡登于壽
考也此方十歲爲準如週歲小兒用十分之一每歲增
加可也若十歲之外小兒宜加人參而已餘味不必加
也

一小兒已出痘遍身上下盡是鮮血點粒粒可數此至佳
之痘也不必發散只須助其正氣自然飽滿貫漿收靨
亦速九日而始回矣然而純用補劑又慮呆補而無疏

通之氣恐速于見功未免升上而不能降下亦非治之
善也方用安幼湯當歸三錢荊芥一錢元參三錢陳皮
三錢熟地三錢麥冬三錢生甘草五分生地二錢黃連
一分丹皮一錢貝母三分水煎服一劑而綻不必二劑
也此方妙在補中帶散則痘瘡力足無內怯之憂散中
實補則痘瘡大泄少外阻之禍世人不知治法往往一
味是補所以多留後患耳至于一味呆散未有不將佳
痘而變爲惡瘡者每至死亡猶以爲胎毒之未盡淨也
仍用散火敗毒之劑以至不救謂非醫殺之而欲冀免

于陰報也得乎幸人善用其方以安幼耳

一小兒出痘其痘瘡之色紅盛煩渴大便乾燥小便短澀而黃赤脉洪大不倫舌上生瘡此陽症之瘡也切忌用濕熱之味然又不可見爲大熱而卽用寒涼之藥恐火熱太盛驟得寒涼而火不肯遽退熱不肯驟解反至生變者有之治法宜用寒而佐以化熱之品用涼而輔以散火之味則不違火熱之性而自得寒涼之益也方用全痘散火湯元參三錢黃芩一錢生甘草一錢梔子一錢桔梗二錢生地二錢荆芥三錢炒黑當歸一錢水煎

服一劑而熱毒盡行解散矣此方用苓梔以清火
又得元參以退其浮遊之火更妙在用荊芥桔梗引火
外出而生地當歸滋其腑臟之燥則雨潤風吹有不變
火宅而清涼者乎所以獲解散之功而無背違之失也
一小兒出痘痘瘡虛空而色又清白發癢中癩身寒顫咬
牙不已腹中虛脹上吐下瀉脉復沉細微弱此陰症之
痘瘡也蓋內寒之極瘡不能發出必須用大補氣血之
藥而佐以溫熱之味則瘡無水凍之虞倘不知其故而
亦用寒散之品則痘瘡內陷而死亡頃刻矣是陰痘戒

用陰分之藥明甚然而其中有似是而非者又不可不辨以痘瘡之善變也色白虛也而發癢又有實症身寒涼也而發顫又有熱症腹脹虛寒也而吐瀉又多實熱之症既非虛寒而亦用溫熱之品安得不死乎然則終何以辨之吾辨之于舌焉舌紅者熱舌白者寒也舌紅而帶白者熱中之寒舌白而微紅者寒中之熱舌大紅而又燥熱之極也舌純白而又滑寒之極也倘舌白而又滑此陰症無疑方用祛陰救痘丹人參一錢當歸三錢白朮三錢附子三分荊芥一錢黃芪三錢水煎服一

劑而色白者卽變爲紅陽回而寒之氣盡散矣此方用
參芪歸朮以補氣血氣旺而陰自難留血足而陽自可
復然後益之附子則奏功始神方中又加荊芥者以附
子直攻其內非荊芥則不能引附子外散耳

一痘瘡初出隱於肌肉之間不見點粒人以爲瘡毒之內
藏而不肯遽出也孰知是氣虛而不能推送以發于外
乎論理用升麻桔梗羌活之類亦能外發然而不補其
氣而惟用散藥吾恐元氣益虛痘發之後未必無他病
之生尙非治之善者也方用發痘散生黃芪二錢甘草

五分當歸一錢桔梗一錢荊芥一錢防風二分水煎服
一劑而點粒見再劑而痘盡出也可以不必再服藥矣
此方之妙雖用桔梗荊芥防風之散藥而實得黃芪當
歸補氣之力則易于推送所以火毒不能隱藏一齊而
盡出也

一痘瘡已見點後熱氣大盛瘡粒過多人以爲火毒之太
甚誰知是血虛而不能以潤乎若止用發散之劑而不
用補血之藥則火盛水乾痘難貫漿矣故必須于補血
之中而少佐之以解毒也方用養痘湯當歸二錢川芎

一錢連翹五分麥冬一錢天花粉三分木通三分甘草
一二分水煎服一劑而熱退二劑而瘡粒明淨盡行貫漿
矣此方之妙妙在當歸麥冬川芎爲君而少用連翹木
通天花粉爲佐使則血旺而火不過炎熱消而毒不內
隱故能速于收功而又無後患也

一痘瘡已出四五日後大小不等根窠不甚紅澤色暗頂
陷不能起發者人以爲火毒之倒塌也誰知是血氣之
虧欠欲出而不能欲發而不得倘徒用化毒之藥則毒
反不消倘徒用催漿之藥則漿反不貫變生不測往往

有入于死亡者治之法必須于補氣之中而輔以化毒
催漿之味方用催痘湯人參三分牛旁子一錢當歸二
錢川芎一錢黃芪二錢茯苓一錢桔梗五分陳皮二分
連翹三分肉桂半分水煎服一劑而色紅二劑而頂突
貫漿矣此方之妙妙在用參芪歸芎之多而發散化毒
爲佐使氣足而不袪于中血足而不陷于內自然痘色
潤澤而肥滿矣

一痘瘡至六日毒宜化漿宜行矣乃顏色不紅綻肥滿是
氣血大虛也萬不可徒攻其火而妄用敗毒之味也必

須以補氣補血爲主方用護痘萬全湯人參五分黃芪
一錢當歸二錢川芎一錢白朮二錢茯苓一錢陳皮三
分牛蒡子三分桔梗五分天花粉三分水煎服一劑紅
潤而肥滿矣不必二劑也此方之妙用全不去消毒攻
火但補氣血而痘自外發且補中有散而補非呆補更
易奏功所以有益無損而收萬全之效也

一痘瘡七八日宜漿滿足矣今瘡平漿薄飲食少減人以
爲毒氣之內陷也誰知是氣血之不充乎夫氣血之不
充者由于脾胃之氣弱也脾胃氣弱則肝血不生肝血

不生則脾胃之氣更弱，又何能致漿足而瘡突哉？治之法必須大補其脾胃之氣而少佐之補血之品，氣血旺而脾胃自健，脾胃健而痘瘡安得不充滿乎？方用保痘湯：人參一錢，白朮二錢，黃芪二錢，當歸二錢，麥冬二錢，陳皮五分，荊芥一錢，如癢加白芷三分，蟬蛻二分。不癢不必加也。如痘色白而薄，倍加參芪一劑而白者不白，薄者不薄矣。此方純是補氣血而補氣更重于補血者，以血得氣而易生也。氣足血旺，何愁漿薄哉？自然飲食倍增，漿老結靨矣。

一痘瘡至九日十日之後漿稀痂薄人以爲痘毒之內蘊也誰知仍是氣血之虧乎夫氣虛補氣血虛補血又何礙乎然而氣血雖虛而痘毒未清不兼顧火毒一味呆補則火毒內藏亦恐痘愈之後有回毒之虞必須於補中微散之爲得也方用全痘湯人參二錢白朮三錢牛旁子一錢茯神三錢陳皮三分當歸三錢通草一錢甘草五分荊芥一錢金銀花三錢水煎服一劑而漿厚膿高矣此方用人參而不用黃芪者以黃芪過于補氣且恐有脹滿之虞不若多人參既補氣而復無增悶之

嫌耳尤妙在用牛旁子金銀花于補中瀉毒得補之益而更獲散之利真善後之妙法也

一痘瘡至十一二日身發潮熱飲食不思當壓不壓痂落無托人以爲毒氣之猶存也誰知是氣血之虛而毒多未化乎方用化痘仙丹當歸三錢白芍二錢人參一錢山查五粒黃芪三錢荊芥一錢牛旁子一錢防風三分甘草一錢金銀花三錢水煎服一劑而胃氣開思飲食矣二劑全愈此方之妙用金銀花與荊芥牛旁子參芪歸芍之中則胃氣不傷脾氣大旺氣血既潤復不尅土

則火毒全解又安有留餘之患大凡痘瘡不補則火毒不出而痘瘡純補則火毒亦不盡出也今于補中用散所以未出能出而既出者盡出也

一痘已見形又出一層紅斑者此夾疹痘也或似斑而非斑或零星錯雜皆是夾疹之症人以爲痘毒之深前未發出而後再發也誰知痘出之時而又感寒風使內熱留中閉塞湊理激動腑毒而並出乎治法宜臟腑並治然治臟不若先治腑也蓋痘毒出于臟疹毒出于腑臟之毒深腑之毒淺淺之毒先散而深之毒亦自難留故

治痘須先治疹方用分痘湯升麻一錢元參三錢麥冬
三錢當歸二錢青蒿二錢生甘草二錢半夏五分生地
三錢荆芥一錢水煎服一劑而疹全散矣此方退陽明
之火解肺經之熱妙在多用升麻引火向外發于皮毛
雖曰消疹而實所以成痘也又何必治疹之後再去治
痘哉

一痘症雖發全數日之後身復發熱遍身發出紅斑癢甚
愈抓愈癢先出大小不一如粟米之狀漸漸長大如紅
雲片人以爲痘毒之尙存從前未經暢發故如此誰知

是痘毒全無乃收痧大愈之後放心縱欲飲食過傷又兼風熱而成之此名爲蓋痘疹似痘而非痘也治法散其風熱而不必顧其痘毒然風熱旣解卽有毒亦無不共解矣方用安痘湯玄參五錢當歸三錢連翹一錢白芍二錢丹皮二錢荊芥二錢甘菊花二錢升麻五分天花粉一錢水煎服一劑而斑輕再劑而斑盡散矣此方化毒而不耗其氣解熱而不損其血所以風熱全消而痘無變症耳

一痘瘡五六日後色變純黑或炭灰之色頭頂陷下不起

飲食到口卽吐此死症無疑所謂壞症也世醫到此無
不辭去然而死中可以求生勿以其壞症而輕棄之也
蓋小兒純陽之氣易離而陰氣難絕倘有一線之陰可
續則引陰以接陽往往死者可以重生而生者得以不
死我受異傳何敢獨秘不共傳以救萬世之小兒乎方
用起死救兒丹人參三錢元參一兩金銀花一兩白朮
二錢當歸三錢麥冬三錢甘草一錢荊芥二錢天花粉
二錢茯神三錢水煎服一劑黑變爲紅再劑而陷者起
乾者潤飲食知味矣此方之妙全在用金銀花與玄參

之多既能解毒復善散火而又助之參朮歸冬則足以濟二味之力而益成其祛除之功所以能轉敗而爲勝起死而變生也萬勿驚其藥品之重與用參之多而減去其分兩蓋藥不重火毒難消參不多則陰陽難復矣願人加意於此方以救小兒于危險哉

一小兒痘瘡治之不得法多至不救誰知痘瘡可以不治治之乎夫兒已生瘡何可聽其自生乎所謂不治治之者服吾藥可使之不生痘不必用藥以治痘也夫兒之生痘瘡者感父母之淫氣以生之也解其淫氣而又助

之化毒之品安得而生痘哉前人亦知此意曾造稀痘丹或治截痘法然服之有驗有不驗者未能深窺痘毒之源與解毒之藥也蓋解毒之品未有不損人元氣者元氣一虛毒卽難解且毒成于火而清必用寒涼之藥但小兒脾胃最忌寒涼之藥一服寒涼土氣匱乏而火毒又能安外泄乎此所以服之而不効也鐸逢異人之傳方法平平而取效實奇方名止痘丹生甘草一錢金銀花三兩元參一兩貝母五分苦參三錢丹皮三錢黃芩二錢將七味擇天赦日用水二碗煎一碗不必兩煎

將此一碗汁重湯又熬至三分用茯苓五錢爲細末將汁調爲丸如米粒大俟半週之時將藥用蜜拌與小兒食之二日服完必下黑糞永不出痘矣痘旣不生何有死亡之痛哉

疹症門 三則

一小兒發熱二三日肌膚之間隱隱發出紅點如物影之搖動時有時無者此影疹也人以爲發斑之傷寒也誰料是出疹發表熱毒外散偶遇大寒大風生冷之犯故皮膚間塞毒氣內收壅住于腠理之間其症皮膚之際

片片皆紅或變白白或轉紅紅或轉紫氣喘腹滿甚而作痛毒氣入臟欲出不能存亡頃刻至危之病也治之法必須化斑而不必治疹蓋疹與斑總皆熱毒耳方用消斑化疹湯元參五錢歸尾三錢石膏三錢白芍五錢地骨皮三錢丹皮三錢荊芥二錢木通一錢青蒿二錢升麻一錢麥冬三錢甘草一錢水煎服一劑而斑化疹散二劑而消歸于無有矣此方不多用大寒之品止用微寒之味者以疹斑之病雖起于大熱然亦因臟腑之乾燥內無水制而外現也今滋其津液則水足以制火

又得引火解毒之藥直走皮膚火毒欲內攻而不可得
又安得不外泄而解散者乎況方中用玄參爲君原能
清浮遊之火何必又多用大寒藥以撲滅其炎威而傷
臟腑所以奏功旣神而又無大害耳

一小兒出疹口中大渴父母暢與之水快甚遂恣其酣飲
乃嘔吐不止因變瀉痢喘嗽不寧小便不利陰囊浮腫
脇痛筋軟膨脹之症生人以爲火熱之不解也誰知飲
水過多水蓄不消之病乎夫心火亢炎因而作渴飲水
必入于心心不受水而傳于脾爲嘔吐瀉痢矣傳于肺

爲咳嗽矣傳于腎爲小便閉而囊濕浮腫矣傳于肝爲
脇痛筋軟膨脹矣夫水本尅火然水多則滯火反得水
以滋其沸騰疹消而他病生焉治法不必治疹而惟在
於分消其水勢水涸而疹亦痊矣方用分水消疹散茯
苓三錢車前子三錢木通二錢猪苓二錢薏仁一兩桔
梗一錢荊芥五分白朮三分水煎服一劑水從小便出
矣連服二劑水盡而愈此方專治水也止用桔梗荊芥
以少提其氣不特水氣因升提而下行倍速且使餘疹
亦從膀胱而下泄也但二味既是提氣何不用升麻麤

之不知升麻提氣必使疹毒由皮毛而出反足以掣製利水之藥之肘不若荊芥桔梗雖提氣而不走皮膚反能佐二苓羣品共走膀胱水與疹而同治也

一小兒發疹之後牙根潰爛肉腐出血臭穢冲鼻人以爲餘毒未盡身上遊熱之不退也誰知皆醫治疹而不治浮火之故使熱積皮膚不用解散清涼之劑以致毒火入胃久而不散因作祟也此等之病必須仍散其火熱之毒倘不知治法縱兒恣食肥甘濕熱動虫勢必變爲走馬牙疳穿腮落齒或面頰浮腫環口青黑唇崩鼻壞

生瘡作癰肉腐唇敗而不可救者多矣方用救疹散毒湯玄參三錢甘草五分黃芩一錢茯苓三錢白朮十箇白薇一錢青蒿三錢麥冬三錢陳皮三分荆芥五分生地三錢乾葛一錢水煎服一劑輕二劑又輕三劑全愈此方乃和乾之味而不用大涼之藥者以疹病既愈其勢雖盛而火毒實輕正不可以外證之重而即用重瀉之味以劫奪之也世人一見此等之病輕用苦寒瀉藥往往輕變重重變死不可不慎

喫泥門 一則

一、小兒數歲後好喫泥土人謂胃氣熱也誰知是肝木之旺耶肝木過旺來尅脾胃之土而土虛不能敵肝思得土以助脾胃故見泥土而思食也治之法平其肝木之旺補其脾胃之虛則土氣無虧自然見土而不嗜也方用六君子湯加減治之人參一錢茯苓三錢甘草五分陳皮五分半夏三分白朮五錢黃芩五分白芍五錢黃土三錢水煎服一劑而肝氣平二劑而脾胃之氣轉四劑不思食泥也此方原是健脾胃之聖藥加入黃芩以清肝火白芍以平肝肝平火清而脾胃自得其養矣尤

妙加入黃土者借土氣以安脾投其所好而六君子湯諸藥益足以展其健運之功耳

胎毒門 一則

一小兒生半歲或一二歲忽身上手足上肚腹上兩臂上或頭面上長成大瘡久變爲毒百藥治之而罔效者此非小兒之毒乃父母之毒也當時結胎或感楊梅之惡氣及其坐胎之後或感淫氣之火邪遂至貽害於小兒治之不得其法半多死亡實可憫也吾遇異人之傳治胎毒小兒已數十人矣皆服之得生我不傳方不特失

異人傳鐸之善心而且使小兒可救之病以不得吾方而失援則小兒之死不猶之鐸殺之乎鐸則何敢故寧傳世使世服方而嘆或有不效斷不可不傳使世之怨無方以救子也方用金銀花二兩生甘草三錢人參二錢天花粉二錢黃藥三錢錦地羅三錢水煎服二劑而毒全消倘外口不愈另有外治之方用蝸牛三錢生甘草三錢冰片一錢兒茶三錢輕粉一錢麝香三分樟腦三錢黃丹三錢水粉三錢枯礬三錢地龍糞五錢各研極細末以麻油調敷瘡口止不到數日自然瘡內生肉

而瘡口外斂真神方也輕者用前方而不必用外治重者內外合治無不速愈矣鐸從萬世起見將此仙方輕易傳世願世人廣傳體鐸之心爲心切勿自恃爲奇隱而不傳以受天譴也

彭陸个卯仲秋
月而觀黃晨曉
峰氏騎物終易
園心槐蔭艸堂